

東  
華  
續  
錄

東華續錄

咸豐三十三年

臣王先謙敬編

臣陶澐宣蒸校

三月庚子朔諭軍機大臣等本日據張亮基奏逆匪於二十四日攻陷鉅野二十五日攻陷鄆城該撫擬由閒道趨赴東平設法繞出賊前迎頭截擊等語賊蹤飄忽已極據各路奏報皆稱該逆意在救援阜城之賊該大臣等前此所奏多係疑詞數日以來又無續報豈此等緊急情形竟未能探得一二耶善祿由東昌一路進兵究竟已抵何處張亮基由東平一路進兵亦未知能否卽與賊遇直隸山東交界處所路徑紛歧賊蹤處處皆可闖入而我兵來往奔馳每苦不能相及我兵稍延一日賊卽深入一步每一念及焦灼難名此時張殿元曾否前往大名前所謂山西澤潞官兵趕

到尙需時日惟有先儘見帶之兵星夜前進隨探隨剿以遏賊鋒  
張殿元所帶之兵不敷勦辦且多未經行陣仍須於該大臣等營  
中派撥馬步精兵並派得力將弁統帶前往勦辦方能得手亦不  
得專事防堵大名致成株守至阜城之賊負隅死拒一聞南賊將  
來必更急圖竄逸該大臣等既不肯分兵南下又不能立將此股  
殲除徒事遷延是何意見朕昨降諭旨甚明本無可再行申諭特  
以東省賊情該大臣等竟茫無知覺不得不詳晰宣示儻僧格林  
沁勝保仍前大意不卽速籌勦辦致令南賊乘虛北竄復有句結  
蔓延情事朕必將該大臣等身家性命相抵別無他論也布置情  
形著卽飛速馳奏張亮基摺片均著鈔給閱看將此由六百里加  
緊諭令知之○諭張亮基奏賊匪攻陷鉅野並續陷鄆城各摺片  
覽奏憤懣之至該撫與善祿分路迎勦逆匪既欲由鄆城竄撲范

縣壽張東平是該撫馳赴東平正可迎頭截擊惟稱善祿約可行抵曹州是該將軍轉在賊後逆匪不由鄆城西奔濮州乃折而東北欲由范縣壽張奔竄或係探知善祿由湖路南來爲此巧避之計該將軍於中途曾否得信趕緊由曹州折回東北繞出賊前與張亮基兩路夾擊該省山路湖路間道紛歧若無確實探報偵知賊蹤所向及至官軍趕到而該逆早已剽掠而去展轉馳逐貽誤更多西界直隸大名各屬已屢飭桂良派張殿元帶兵防堵並由山西調兵前來協防惟該逆意在接應阜城則范縣壽張一帶既須嚴行截阻且東昌臨清爲商賈雲集士民富饒之區尤不可爲賊所覬覦致令闖入至運河東路汶上東平各縣下則近接濟甯上可東趨省會該逆如經官兵攔截或肆意衝突亦須豫籌堵禦究竟此起賊匪共有幾股是否接連而行抑係分路鈔掠急須探

明情形方不至誤向他途致兵與賊不得一遇見在能否將該逆截剿該撫與該將軍如何聯絡聲勢賊匪究向何處著善祿張亮基迅籌合力邀擊仍隨時馳奏並知照僧格林沁勝保桂良一體派兵截擊毋任北竄將此由六百里加緊各諭令知之○諭本日據青麐奏省城因援兵不至實難保守並歷陳他處保全城池總賴外援接應等語見在皖省及東豫情形均極喫緊卽有可調之兵各處亦俱須援應豈能專顧湖北卽漢陽黃州等處逆匪紛擾亦當次第殲除豈能專顧武昌省城青麐疊次奏報不但毫無籌畫且於別處情形總未知悉偵探亦不能確實是以所奏軍情於見在時勢總皆隔膜至所稱意見所及權不能行尤屬藉詞推諉青麐與崇綸同在一城每次皆單銜具奏並不會銜是青麐先已自存意見見已授爲湖北巡撫統轄全省尙得謂事權不屬乎噫

曉濱辯於事何濟此時惟有盡心籌畫竭力防守台湧已克復黃  
陂進攻漢陽當可與省城聲勢聯絡至曾國藩所帶船礮見因賊  
由岳州上竄近偏長沙該侍郎初抵長沙省城已與賊遇不能剋  
期下駛著青麐崇綸就見有兵勇於城內外審度機宜妥籌布置  
與台湧隨時知照盡心堵禦毋徒坐待援兵諉過他人也將此由  
六百里加緊諭知青麐並諭崇綸知之○辛丑諭內閣吏部奏遵  
議曾國藩處分一摺前因曾國藩請將休致巡撫楊健從祀鄉賢  
祠係道光年間奉 旨不准之案該侍郎袒護同鄉專擅入奏降  
旨交部議處茲據吏部奏請革職實屬咎所應得惟念該侍郎見  
在督帶礮船勤辦賊匪連獲勝仗尙知奮勉曾國藩著加恩改爲  
降二級調用仍著督帶兵勇迅殄賊氛毋稍延緩○駱秉章曾國  
藩奏逆匪竄陷岳州後乘風直過洞庭湖於二月初六日竄入湘

陰縣城該縣文武不知下落賊船已抵靖江喬口一帶約數千號查靖江距省僅五十里所有省城守禦事宜臣駱秉章會同臣鮑起豹妥爲布置惟靖江汊港紛歧水陸兩路可通河西之甯鄉而至益陽湘潭等縣臣駱秉章當卽札委知縣王鑫統帶練勇一千六百名先由陸路馳往靖江一帶截剿適臣曾國藩亦已抵省飭派生員曾國葆及同知趙煥聯訓導儲玖躬分帶陸路湘勇三營前赴喬口合擊臣駱秉章復添委知州朱孫詒等管帶練勇六百名勝勇百餘名前往策應王鑫先在杉木橋地方見有賊匪上岸擄掠當卽率勇迎剿擊斃賊匪奪獲船隻十三日戰於新港河岸賊匪鈔尾般至經帶勇之王文瑞抵住兩路鏖戰般斃賊匪百數十名燒其大船十餘號復經帶勇之謝仁峻李若霞在於所守隘口擒斬多名共計生擒般斃及落水死者約數百人我勇膽氣愈

壯見在趕造浮橋整隊前進曾國葆在新康一帶擊斃長髮賊三十餘名奪獲米船二隻馬匹多件儲致躬委赴靖江聞賊分竄甯鄉當卽商同趙煥聯前往援剿儲致躬率勇由龍塘灣殺進西門又殺至北門轉至南門共殺斃賊匪三百餘名落水者不計其數不料轉至南門該匪復於東城外突出二三百人儲致躬帶勇追殺身受十餘傷當卽陣亡賊匪亦敗竄下船連夜逃赴靖江全數下竄喬口等處臣等隨添委副將塔齊布管帶撫標兵丁及湘勇寶勇共一千二百名又委候補道胡林翼管帶黔勇六百名千總周鳳山等分帶練勇各五百名均由陸路會同王鑫等馳赴喬口湘陰一帶極力攻剿並飭委千總楊載福生員彭玉麟分帶水師八百名配齊船礮順流跟追臣等仍隨時察看如須續添兵勇卽會商辦理武陵縣訓導儲致躬追賊陣亡籲懇 天恩從優賜



卹署甯鄉縣知縣馬丕慶岳州城守營參將烏拉理未能堵禦請  
旨革職審辦臣駱秉章與提臣鮑起豹均有地方之責未能先事  
防範應一併交部議處上諭內閣賊船竄入湘陰縣城並靖江  
喬口一帶經駱秉章派令知縣王鑫等帶勇截剿王鑫在杉木橋  
地方曾國葆在新康一帶均能迎擊屢獲勝仗著卽督飭文武員  
弁跟蹤進剿儲玖躬帶勇殺賊身受多傷陣亡實堪憫惻著交部  
從優議卹岳州城守營參將烏拉理於賊匪竄擾岳州時不能進  
剿失陷城池署甯鄉知縣馬丕慶不能極力堵禦均著革職拏問  
如訊有畏葸逃避情弊卽著從重治罪駱秉章鮑起豹未能先事  
豫防均著交部議處其失守地方文武下落著卽查明具奏○諭  
軍機大臣等據僧格林沁勝保奏請撥防兵進駐獻縣等語據稱  
賊陷卹城於二十七日竄入張秋鎮見派總兵桂齡帶官兵一千

名台祿帶吉林馬隊二百五十名駐紮德州以爲善祿後路聲援如賊勢猖獗勝保卽督馬隊前往迎剿惟阜城之賊經大兵四面兜圍無隙可乘勢必拌死抗拒兵力旣分難免顧此失彼不能不先事豫防添撥重兵以資剿辦著載齡卽派雙禧穆輅將原帶防兵各一千名迅速管帶馳往河間獻縣一帶聽候僧格林沁等調遣毋稍遲誤見在阜城之賊尙未殄滅徐州渡黃逆匪已擾及山東境內直隸大名等處防堵均關緊要雙禧穆輅見令帶兵前赴河間近畿一帶尤當加意嚴防是否應須分撥布置之處卽著載齡酌量情形妥速籌辦並飭各路帶兵大員嚴密防範勤加偵探毋得稍有疏虞將此由六百里諭令知之○諭前據恒春奏請於山西省簡練精兵以節經費當派恭親王奕訢裕誠徐澤醇會同該部議奏嗣據該王大臣等覆覈具奏行令恒春悉心體察可以

裁汰兵丁若干節省餉銀若干詳查覆奏尙未據該撫奏到本日據御史蔣達奏請倣照古法每州縣三十戶出丁一名出丁之家免其徭役每戶出制錢一千以爲一丁終歲口糧無事則仍歸耕鑿有事則其赴疆場將來各省有名無實之兵弁皆可由此漸次酌減於國計亦有裨益此等練勇止可於附近調用各等語軍興以來地方被賊蹂躪已及數省調兵籌餉徒事紛繁各直省大吏誠能豫籌練兵之法保衛地方何至糜餉老師毫無實濟該御史所稱足兵省費不爲無見且該撫前奏亦有查明汛地之衝簡酌畱兵丁名數餘俱裁汰自係爲覈實起見見在山西如何籌辦著卽詳議章程迅速奏聞該御史所請著一併悉心詳議具奏務期兵歸實用餉不虛糜方爲妥善原摺片均著鈔給閱看將此由四百里諭令知之尋奏各省地方情形不同若悉令按戶出丁出錢

轉恐近於抑勒應請飭令各地方官詳察本地情形實心籌辦使  
富者出貲貧者出力庶可收眾志成城之效下王大臣會同兵部  
議行○駱秉章奏伏查此次髮逆先踞黃州下通皖省實爲腹心  
大患臣將滇兵楚勇併令馳往皖省救援嗣聞該逆已由黃州上  
竄漢陽等處正擬派撥兵勇前往援剿詎因連日北風該逆遂卽  
乘舟上駛竄陷岳州見在南省兵丁及調到鎮筸營弁兵僅及四  
千有零若於各營中酌量抽撥雜湊成軍派員統帶則兵不知將  
將不知兵平日既不相習臨時難期應三是以歷次剿辦土匪及  
此次派出追剿者俱係臣與曾國藩召募自練之壯勇較爲得力  
且該逆見已竄至湖南鄂省情形較緩擬俟南省剿辦事竣臣卽  
派撥兵勇馳往鄂省跟蹤追擊得旨楚南之賊明係分竄見在湖  
北尙有多賊曾國藩礮船原爲肅清江面第此時道路不通暫可

畱在湖南勦辦亦不能專待事竣緩緩北上俟楚南辦有頭緒仍應速赴湖北爲是曾國藩素明大義諒不敢專顧桑梓置全局於不問北重於南皖鄂重於楚南此不易之局也又奏飭委貴州候補道胡林翼在楚南勦賊批胡林翼著暫畱湖南俟岳州府收復後卽行飭令速赴湖北或至武昌或至台灣軍營○兩江總督怡良等奏請飭前任江南河道總督潘錫恩安徽學政孫銘恩辦理甯國等屬防勦事宜允之○以殲斃直隸阜城逆首吉文元賞甲兵金陞伊勒喜六品翎頂○綏遠城將軍盛燾等奏山西巡撫恆春咨調官兵一千名赴山西防堵得旨允行○予福建陣亡通判董正官安徽陣亡知縣唐治祭葬世職○壬寅諭內閣裕瑞奏請將擅離營伍投效軍營之世職注銷保舉一摺四川綏甯協屬世襲雲騎尉王家冀前在該副將衙門稟請前赴廣西軍營差遣不

候轉稟該管總兵批示卽行啟程迨軍營得有保舉又復告病回營實屬謬妄王家冀前經降旨以本班儘先補用之處著卽撤銷由營責懲軍營投效人員原期有神實用若本無技能鑽營保薦以爲進身之階竇爲近來惡習前經疊次申諭軍營嚴行甄覈恐濫竽充數者仍復不少著各路統兵大臣查明見在軍營效力文武員弁除奉旨發往及該大臣等奏明帶往外如有自行投效於軍務不能得力者卽著嚴行裁汰不准稍事瞻徇致多冒濫將此通諭知之○諭軍機大臣等善祿奏二十七日馳抵東昌探聞賊眾三四千被脅難民無數占踞張秋鎮該處爲三岔總路且橫跨運河中有橋梁分頭進剿旣難防其分竄又恐直撲東昌該將軍見在南關外紮營嚴兵以待二十九日該逆又竄入陽穀縣城等語此股逆匪意在救援阜城賊眾奸謀詭譎聲東擊西見旣與賊

相遇著卽趕緊督兵進剿並知會張亮基星速前進爲兩路夾攻之舉正可乘其喘息未定激勵弁兵一鼓殲除毋得專事堵禦致失事機若攻剿稍遲該逆非負嵎死守卽乘間紛竄剿辦更難得手昨據僧格林沁勝保等奏已派總兵桂齡帶西甯固原河州官兵一千名台祿帶吉林馬隊二百五十名馳赴德州以爲該將軍後路聲援本日復諭令該大臣等酌量派兵策應著善祿卽催提此項續派官兵應於何處分撥遏賊竄路務當以剿爲防萬勿遷延貽誤張亮基所帶之勇改赴東平計日已早到營該逆利在狂奔臨清大名各路均關緊要此股逆匪卽責成善祿張亮基合力進攻儻有疏虞致令乘隙竄擾朕惟善祿張亮基是問將此由六百里加緊各諭令知之○諭善祿奏探明賊蹤迎頭堵剿一摺該將軍馳抵東昌探聞賊匪數千竄入陽穀縣城聲言仍撲東昌善

祿見在南關外紮營已咨勝保添兵截剿此股逆匪勢甚剽疾意在接應阜城之賊必須乘賊蹤未定一鼓殲除勿令勾結爲患著僧格林沁勝保卽酌量添派精兵馳赴善祿軍營毋稍遲誤其直隸大名一帶仍嚴飭張殿元實力巡防妥爲布置該大臣等務當統籌全局權衡輕重斷不准任令匪蹤闖入直境更滋蔓延將此由六百里加緊諭令知之○癸卯諭內閣孫銘恩奏懇恩開缺回籍省親一摺上年以賊竄池州等處諭令安徽學政孫銘恩傳諭各屬紳民認真團練曾據將籌議情形覆奏昨復明降諭旨令該學政督同潘錫恩辦理防剿原以皖省賊氛肆擾該學政於考試事宜未能按期舉行正可專心督辦防剿茲據奏稱伊父年老多病請開缺回籍省親並未聲明伊父年歲若干亦未奏請假期並云臣自歷任以來深以規避爲恥意圖欺飾豈知欲蓋彌彰該學



政值國事之艱則視如秦越朕斷不深究若該學政之父病非沈重孫銘恩尙有面目見天下士乎若必畱任在皖於事無益孫銘恩著准其開缺回籍省親俟銷假時以三四品京堂降補○諭軍機大臣等平安峪吉壤本係陸應穀等選擇前年朕親往履看復令裕誠等前往覆勘其時陸應穀在河南巡撫任內未及隨同前往見派柏葰慶錫帶同陸應穀查勘遷安縣桑園縣銀礦著俟勘明後柏葰卽督同陸應穀前往平安峪覆加相度詳細覆勘前年所定標識處所高下丈尺是否合宜並山向水法一切形勢繪圖貼說由柏葰具奏將此諭令知之○以李蔚爲兵部右侍郎由左副都御史  
遷○甲辰諭軍機大臣等前曾疊降諭旨以直隸大名一帶空虛飭令僧格林沁勝保統籌布置並令桂良嚴飭張殿元督兵前往扼截兼令副將達年帶兵迎勦屢次寄諭並謂不得專事防堵

大名致成株守原以張殿元未經與賊接仗恐不能深悉賊情所帶各兵尤恐不能得力既經諭令桂良嚴密防堵仍責成該大臣等酌撥馬步精兵前往勦辦該大臣等自應遵照諭旨通籌大局斷不准東境賊蹤闖入直隸致與阜城賊匪會合乃本日據勝保馳奏賊由陽穀竄過莘縣攻陷冠縣竟於初一日竄至清河縣屬之小灘地方屯聚並有由館陶清水莊竄至距臨清二十五里之李官莊各稟報覽奏曷勝憤懣善祿前奏已抵東昌南關而賊由西路繞出其後張亮基在東平尙隔運河均恐爲該逆避實擊虛奸計所誤勝保帶兵星速前進所見尙是崇恩防守臨清未悉兵力如何勝保於馳抵故城後迅速迎至清河盡力截勦萬不可令北與阜城之匪聯絡仍飛飭善祿趕緊設法繞赴館陶冠縣西北各路面面兜圍俾不得混入大名界內與威縣等處並隨時與

僧格林沁知會知須添調馬隊卽由該大臣咨商妥辦總期兼籌統計不可顧此失彼此股賊匪自皖豫北來眾至數萬亡命赴援其兇悍殊堪髮指若不迅將阜城賊匪掃除萬一突圍而出與南賊合併勢更不可收拾僧格林沁督兵一萬數千名足資圍剿著卽迅圖攻克不得再事遷延坐俟南賊之至其武邑衡水聚強各處尙有勝保大軍在南如阜城附近各村賊匪南竄尙可回兵夾擊其阜城東北各路如何設防該大臣有無把握雙禧穆輅所帶官兵二千名曾否趕到添撥何處防守均著迅速馳奏並著該大臣等隨事隨時得有探報飛咨桂良載齡一體嚴防將此由六百里加緊各諭令知之○諭怡良許乃釗奏剿辦上海逆匪情形一摺所敘連日接仗情節均係逆匪撲出我兵堵截並未見奮力進攻不過小有斬獲何時能掃穴擒渠蕞爾孤城剿辦如此費事實

所不解據奏逆匪圖竄之意甚堅連日竄撲或千餘人或數百人而我兵所殺總不甚多卽十二日之戰逆匪改裝衝突被兵勇追擊四路潰散尤難保無乘間逃逸之匪潛匿附近地方上海接壤各處如松江府嘉定太倉川沙南匯等屬雖經怡良等前此派有弁兵豫爲防範究竟能否得力儻城中逆首未殲而鄰境復有勾結勦辦愈形費手見在向榮添派之兵又經續到一千名豈得尙以兵力單薄爲詞著卽嚴飭帶兵各員趕緊進攻萬不准徒事堵禦空勞兵力至水路各營據連次所奏僅於陸路接仗時遙爲聲援尤屬不成事體豈將以黃浦師船爲吳健彰等藏身之固而專恃一投誠報仇之李紹熙遂能力遏賊鋒耶許乃釗若再不迅速籌攻止知以陰雨難行硝磺不繼爲詞朕決不能再從寬貸怡良身任兼圻亦難辭罪也將此由六百里加緊諭令知之○諭台灣

奏統籌兩省全局一摺所見俱是楚北逆匪全股盤踞漢陽其分竄德安一帶之賊前經台湧撥兵截剿業將黃陂縣城攻克必須乘勝進攻將雲夢應城孝感等處餘匪次第殲除方能全軍南注爲肅清漢陽之計武昌省垣爲江路阻隔目下賊蹤蟻聚北岸省城情形較緩且存城兵勇爲數尙多足敷布置若將北路得力之兵撤調赴省則江北更屬空虚崇綸見在丁憂仍畱該省辦理防剿事宜已授青麐爲湖北巡撫疊據該撫奏報各情惟以孤守無援爲詞別無籌辦之策節經諭令就見存之兵盡心守禦惟能否得力殊不足恃著台湧體察機宜隨時與該撫互爲知照以期聲勢聯絡所調江西水陸各軍並著飛提駛赴上游會合迎剿備能先將江面疏通則漢陽與武昌南北無阻剿辦庶易得力該督又稱岳州對岸之荊河腦地方爲荊州要口若竄岳之賊被剿窮蹙

恐由此路旁趨至荆所慮亦不爲無見昨據駱秉章等奏稱帶勇分剿靖江喬口及南鄉等處賊匪辦理尙屬得手該逆見已全數下竄留國藩亦卽統領兵勇跟蹤進剿仍著台湧兼籌扼截之策於四川松潘建昌兩鎮官兵提到後卽嚴飭各該員弁將此項兵丁駐紮荊州嚴密布置以扼賊匪上竄之路仍須探明岳州賊情如須出境迎擊卽剋期統帶前往與湖南會剿勿以有用之兵置之無用之地本日已諭令佈克慎署理湖北提督該員見在黃陂一帶進剿著卽毋庸前赴湖南台湧身任兼圻責無旁貸一切剿辦機宜惟當妥籌大局迅掃妖氛以副委任將此由六百里加緊諭令知之○諭本日據鄭敦謹奏歸德土匪見有牛鑑等督勇剿辦請飭桂明速由黃河北岸徑趨曹州一帶迎擊自係先其所急惟據勝保所奏逆匪已由莘縣竄入直隸清河縣境鄭敦謹所請

意在保山東以固河南就軍情緩急而論惟有徑赴直隸方能迎頭邀擊若專注曹州已落賊後著桂明卽統所帶官兵無論何處渡口星夜渡河而北沿途遇賊卽行截擊若能閒道出奇繞赴大名以北更可得手斷不准故意紆折致誤事機桂明防堵潼關已將一載所帶官兵蓄銳已久諒不至沿途停頓自干重罪也將此由六百里加緊諭令知之○諭據勝保奏探聞賊已攻陷冠縣並踞館陶縣所屬之地距臨清甚近北路情形萬分緊急儻再有南來逆匪陸續渡黃與東省之賊接應剿辦愈難得手楊以增旣專轄黃河百勝等又防堵徐州日久業已疏忽於前漫無抵禦若再任該逆偷渡罪更難追茲據張之萬奏黃河上流各渡惟碭山一帶河口最關緊要若該處不扼要嚴防必致皖省之賊任意往來與渡河逆匪時通消息著楊以增等迅將碭山一帶趕緊設法籌

防派令精銳弁兵嚴緝奸宄斷其往來之路並著百勝等卽就見帶兵勇實力防勦儻仍不知奮勉屢次嚴諭視爲具文使逆匪續有偷渡必將該河督等從重治罪所有見在籌辦情形並著隨時奏報毋稍延緩將此由六百里加緊諭知楊以增並傳諭百勝王夢齡知之○戶部右侍郎王茂蔭奏鈔法未善酌擬章程四條並以兵民怨恨自請嚴議得旨王茂蔭身任卿貳顧專爲商人指使且有不便於國而利於商者亦周慮而附於條款內何漠不關心於國事至如是乎並自請嚴議以謝天下明係與祁寯藻等負氣相爭讀聖賢書度量顧如是乎且謂廢黜不敢怨悔設是時故激朕怒將伊罷斥伊反得身後指使百計阻撓看伊奏摺似欲鈔之通行細審伊心實欲鈔之不行且有挾而求必應照伊所奏如是欺罔將謂朕看不出耶此摺著軍機大臣詳閱後專交與恭親王



載銓速行覈議以杜浮言又奏愚民誤用偽鈔請飭下刑部但有  
承手承認即將收用之人省釋以免民累批此奏尙不爲無見○  
江南河道總督楊以增奏分飭揚徐海三屬將已徵錢糧漕米鹽  
課迅解江北大營接濟兵餉得旨非尋常照例飭催者可比著加  
緊嚴催以期軍營早得接濟○湖廣總督台湧奏賊竄湖南統籌  
全局酌擬辦理得旨朕惟觀汝之心地試汝之才具學與不學何  
關緊要汝由將軍放紉督朕尙冀汝無文員習氣何任事之初先  
存此見又批始終如一不可行與言違○以吉爾杭阿爲江蘇布  
政使由常鎮通海道遷○乙巳 皇后祭 先蠶○諭內閣德齡等奏各  
城年班伯克請俟下屆進京並應進貢物請旨遵行一摺所有各  
城年班伯克著統俟咸豐六年年班再行來京葉爾羌喀什噶爾  
應進道光二十七年額貢著加恩豁免其咸豐三年分貢物著俟

六年年班伯克進京時一併呈進以示體恤○僧格林沁奏臣連  
日督飭官兵極力進攻該逆死守不出三月初二日豫派馬步各  
隊官兵於夜半暗伏賊巢左近使前次投出之甯宗揚等七名分  
向塔兒頭紅葉屯賊巢聲喊引誘該逆由紅葉屯撲出三四百名  
由東南關撲出二百餘名我兵俟其離巢較遠奮勇壓下該逆力  
不能支狂奔敗退殄斃紅葉屯賊匪二百餘名其東關撲出賊匪  
經侍郎慶祺督帶兵勇殄斃多名餘匪退入賊巢正在設法籌辦  
接據各路探報賊匪連陷金鄉陽穀等縣逆餓甚熾勝保酌帶馬  
步官兵七千餘名啟程前進連善祿等所帶官兵合計一萬一千  
餘名兼之山東本省官兵練勇足資堵剿臣原統京旗及蒙古官  
兵七千餘名勝保酌留馬步官兵一萬四千餘名侍郎慶祺統帶  
官兵二千餘名共合二萬三千餘名勝保移營後臣正慮阜城東

北空虛雖商令德勒克色楞移營東北仍恐兵單難恃適前任江甯將軍托明阿到營當將直隸官兵一千餘名令托明阿統帶亦在東北長濠之外駐紮與德勒克色楞互相聯絡見在兵分勢單臣惟激勵將士迅埽妖氛張亮基奏據探賊由鄆城北竄占踞張秋鎮臣催督練勇正由山路前進一聞此報立即改赴湖路疾趨於三月初一日馳抵東平州距張秋僅八十餘里又探賊由張秋攻陷陽穀竄過莘縣直撲朝城西北顯因大兵將到聞風而遁若不由朝城旁趨直隸必由冠縣堂邑北擾臨清臣甫抵東平賊又改竄而所帶步卒每日疾行百數十里急難繞出賊前查東省自逆匪闖入後各屬土匪遽起又聞黃河以南逆匪尙眾無兵防守紛紛續渡臣以一人兼顧實屬不及查臬司厲恩官業已帶兵回覓見將剿辦土匪事宜專委該司督屬嚴辦至臣所帶練勇僅二

千餘人若以全軍盡躡賊蹤徒成尾追之勢東平拏獲奸細俱稱該匪有由臨清竄赴故城接濟北賊之語因將所帶練勇分撥一半派委遊擊玉山等分隊管帶馳詣朝城會同善祿兜剿其餘練勇親自統領迅由間道馳往臨清以待迎頭截擊如此兩面兜截中間又有善祿在堂邑橫衝勦辦必可得手若防河一事前派濟甯州黃良楷專司其事而金鄉鉅野魚臺等處難於顧及同知高振洛曾任單縣頗得民心且熟悉情形茲委該員趕緊精壯民勇千餘名在豐單交界處所實力巡防以杜南匪續竄惟豐工南北兩岸均隸江南該處無兵扼守相應請旨飭下江南督臣南河河臣徐州鎮道迅撥重兵駐守豐工以防逆匪續渡上諭軍機大臣等此次誘賊離巢殄斃賊匪二百餘名仍不過小有斬獲未能迅克賊巢覽奏殊深焦急勝保移營後阜城東北令德勒克色楞

托明阿帶兵駐紮自應如此布置勝保及善祿等所帶官兵統計一萬一千餘名諒已足敷剿辦設該逆繞道北犯德勒克色楞西凌阿托明阿皆係幫辦大員儘可酌派一員督帶馬隊前往奮力截擊若僧格林沁自行帶兵前往竟將阜城圍困之賊交德勒克色楞等剿辦該幫辦等無所統屬事權不能歸一儻該逆乘虛竄出與南來之賊互相勾結或仍由東北回竄交河等處豈非該大臣貽誤之罪此時逆匪竄擾清河勝保由故城進剿必應力遏賊衝尤當設法兜截勿令逆匪繞越致我兵又成尾追之勢本日據張亮基奏探聞真賊不過千名餘皆沿途裹脅此等烏合之眾自入山東境內並未大受懲創若我兵奮力攻擊尙不難一鼓殲擒兵貴神速萬不可少涉觀望致誤事機雙禧穆輅所帶官兵二千名前諭令調赴河間茲據僧格林沁奏稱北防緊要復令折回承

州朕思遠防不如近勦該逆知我兵由故城進攻或折而西竄則  
棗強南宮冀州等處在在堪虞著僧格林沁卽將雙禧等所帶官  
兵均撥於保定迤南扼要地方以勦爲防毋庸折回涿州其北路  
一帶已諭載齡妥爲布置矣阜城逆匪不過數千僧格林沁尙有  
兵二萬三千餘名勝保亦帶兵萬餘兵力不爲不厚若以兵分力  
單爲詞再事遷延不思迅掃賊氛是該大臣等一誤再誤厥罪爲  
均朕惟執法從事不能倖邀寬典也將此由六百里加緊各諭令  
知之○諭昨據勝保奏稱賊由陽穀竄過莘縣攻陷冠縣初一日  
竄至清河縣屬之小灘地方屯聚本日據張亮基奏報各情大畧  
相同惟賊竄清河並未提及豈該逆已由東入直該撫竟茫無聞  
見耶此股竄匪剽疾異常渡黃後連陷金鄉等處豕突狼奔意圖  
北竄自到山東所過州縣毫無阻滯如入無人之境張亮基統轄

全省已屬罪有應得乃該撫前由景州迎勦並未與賊一遇復由齊河繞至東阿賊方北竄而該撫轉向南趨據稱由博平清平一帶繞越前進豈非徒託空言仍落賊後刻下勝保已帶兵由故城迎頭截擊遏賊北竄張亮基若不趕緊督帶練勇設法攻擊爲兩路夾攻之計豈以賊匪竄出東境遂可卸責諉罪耶至各屬土匪卽飭臬司厲恩官痛加勦洗毋令與逆匪勾結並飭同知高振洛於豐單交界處所嚴防河口勿任南匪續竄將此由六百里加緊諭令知之○諭見在直省萬分喫緊賊竄清河復有由館陶等處竄至臨清州李官莊之信顯係分股竄擾張亮基由博平一帶繞越前進善祿由東昌一路橫擊均恐落後勝保見已帶兵馳赴故城遏其竄路桂明接奉前旨諒亦渡河由北岸行走著卽督率官兵迅速前赴直隸境內沿途偵探賊蹤何路緊急設法追截若能

出其不意中途邀擊勦辦更爲得手萬不可稍有遲延致誤事機  
前調之山西澤路官兵一千名並著飛催趕到以資攻勦將此由  
六百里加緊諭令知之○丙午諭內閣前因安徽賊匪由豐工偷  
渡黃河竄擾山東金鄉等處經僧格林沁勝保派令善祿等督兵  
迎勦本日據崇恩奏逆匪直撲臨清州該藩司派濟南城守營參  
將吉興等分路迎擊復派署臨清營副將慶順等出城接應竊斃  
賊匪數百名奪獲旗幟器械火藥雲梯多件生擒賊匪三十餘名  
該逆復在南關占踞又據善祿奏馳抵臨清探知賊在李官莊等  
處屯聚該將軍派令魁福帶馬隊在臨清迤南堵勦善祿等帶兵  
進攻賊匪分股抗拒我兵奮勇攻撲槍礮齊施斃賊不計其數賊  
眾蟻聚河岸我兵大隊繼至復斃賊七八百名此次逆匪竄擾臨  
清崇恩督率將士等奮力擊退所有出力官兵紳勇著崇恩酌量



保奏毋許冒濫善祿等督兵進剿疊獲勝仗惟逆匪分股偷渡運河該將軍等未能竭力堵禦實屬罪有應得善祿魁福均著革職畱任勝保見已帶兵迎剿卽著該大臣督率各路官兵迅殄賊氛毋稍延緩○諭軍機大臣等善祿奏賊匪屯聚李官莊我兵接仗情形一摺本日已明降諭旨將善祿等革職畱任矣該將軍行抵臨清初次與賊接仗雖殲斃賊匪約七八百名而該逆已渡河北竄臨清關外尙有未經渡河之賊屯踞民房前據勝保奏賊於初一日竄至清河縣屬之小灘地方該大臣已帶兵由故城迎擊計日當可趕到此時善祿自應迅速渡河追剿與勝保大兵合力夾擊爲一鼓蕩平之計斷不准藉口兵馬疲乏遷延貽誤任令逆匪分竄剿辦更難得手善祿等不能遏賊北竄已屬罪有應得若再有疏虞不知奮勉國法具在豈能倖邀寬典耶正在寄諭間據勝

保奏馳抵鄭家口先派桂齡督帶馬步各隊官兵前往臨清攻剿等語該大臣因恐該逆繞道北趨暫駐該處爲南北兼顧之計善祿係幫辦大員著卽督同桂齡迅將渡河逆匪合力殲除毋得專待該大臣馳往督剿轉滋貽誤此股渡河竄匪剿滅淨盡卽著馳赴臨清以南與張亮基等督率兵勇肅清東境毋令蔓延將此由六百里加緊諭令知之○諭貴州學政黃統奏粵西匪徒充斥請速撥兵餉剿辦一摺上年因廣西省自逆匪竄出之後伏莽未清蔓延通省當經諭令勞崇光督飭所屬揀選兵勇認真剿辦並曉諭地方紳民人等舉行團練該撫果能實力勦捕不難卽時撲滅若如該學政所奏柳州慶遠百色等府廳盜賊成羣肆行無忌以致沿邊界連地方無不戒嚴防範殊屬不成事體且恐蔓延湖南雲貴句結廣東土匪剿辦更爲棘手右江道張敬修前據葉名琛

奏已飭令回任著與提督惠慶督飭該員並地方文武趕緊將各股匪徒盡行剿除毋令日久爲患一面仍諄諭地方紳士各自辦理團練以助兵力至該學政所請添兵籌餉一節近來各路軍務殷繁不但帑項支絀卽徵調亦緩不濟急該撫惟就本省地方設法籌辦並隨時知照葉名琛就近接濟毋得任令匪徒肆擾致干重罪將此由六百里諭令知之○二品銜已革漕運總督李湘棻奏探聞賊匪北竄擬徑趨濟兗一帶鈔出賊前迎頭剿擊得旨覽汝以革任大員猶單銜奏事並未有與賊接仗迫不可緩之勢殊屬妄爲李湘棻著降爲三品頂帶伊若奮勉出力朕必格外加恩若遇賊接仗大獲全勝方准伊專摺具奏○丁未諭內閣恭親王奕訢親王銜定郡王載銓奏遵議王茂蔭條陳鈔法窒礙難行一摺著卽照所奏均無庸議寶鈔之設原以裕國便民王茂蔭由戶

部司員經朕擢侍郎宜如何任勞任怨籌計萬全乃於鈔法初行之時先不能和衷共濟止知以專利商賈之詞率行瀆奏竟置國事於不問殊屬不知大體復自請嚴議以謝天下尤屬膽大設使朕將伊罷斥轉得身後指使百計阻撓如是欺罔豈能逃朕洞鑒耶王茂蔭著傳旨嚴行申飭○諭軍機大臣等前因袁甲三追賊不及折回宿州當諭令嚴防南來竄匪連日以來並未據該給事中奏報軍情究竟回竄永城之賊蹤迹若何該給事中曾否向前迎剿本日據百勝等奏永城賊匪在潁州回溜集地方被民勇截擊不能竄回六安並有袁甲三帶兵馳往之語見在廬州迤北逆匪土匪充斥分擾秦定三在西北一帶堵截未能專顧徐州百勝等又不能離城遠出該處帶兵大員僅止袁甲三一人袁甲三所帶兵勇爲數不少豈可株守宿州不爲進剿之計且永城雖經

收復據百勝等所奏尙有陳家集克家集等處擒匪李月宋萬逆黨數千人肆行焚劫正陽關一帶雖有劉玉豹撥兵駐守其六安迤北之霍邱縣亦爲南賊北竄要路袁甲三及和春等疊次奏報均未籌及和春等但知圍一廬州固難辭咎然北路不能兼顧亦係實情該給事中若仍專注宿州則潁亳歸陳一帶將聽匪黨橫行置之不問耶著袁甲三卽督見帶兵勇趕緊剿辦務將廬州北路賊匪悉數埽除並嚴杜逆賊自六安一帶續來之路與河南防剿兵勇合力兜截儻再有疏失惟袁甲三是問壽州臨淮兩處防兵應如何移緩就急以剿爲防之處卽與和春福濟妥籌酌撥將此由六百里加緊諭令知之○論百勝王夢齡奏徐郡紳士團練民勇設防勸捐並保衛蕭碭縣城請將該紳民給予獎勵等語此次逆匪竄入徐境郡城兵力甚單該紳士等挑選民勇竭力扼防

並隨同官員堵禦追剿俾蕭碭縣城得以保衛尙屬奮勉急公著  
百勝王夢齡擇其尤爲出力者酌請獎敘候朕施恩毋許冒濫至  
該地方文武員弁本有守禦之責業已任賊偷渡黃河不能堵截  
已屬罪有應得惟念守禦縣城尙無疏虞姑免置議著百勝等懷  
遵恩次諭旨督率兵勇紳民將南來逆匪實力防剿毋令續有偷  
渡致干重罪將此由六百里傳諭知之○山東巡撫張亮基奏馳  
抵臨清東關擬與將軍善祿會商剿辦得旨該逆分股過河仍復  
占踞臨清意圖牽掣我兵逞其逆轍昨有旨催善祿往北緊追今  
觀汝奏欲與伊會商朕恐汝畱下善祿或善祿亦藉詞不進則斷  
不可汝所帶練勇既可自信則足敷剿辦李湘棻能否得力著隨  
便奏聞斷不准因係本省大紳稍有回護又批賊情變幻靡常此  
數日又不知若何情形若臨清勢緩汝仍應迅往北來夾擊爲是

不可託故觀望○袁甲三奏賊竄正陽關請派大員帶兵移駐並擬卽回宿州得旨門戶已開尙堪補救豈能任其奔突置若罔聞汝因何又要折回宿州又奏宿州臨淮均須守禦請指派駐紮處所批朕豈能指汝一定之處是時總以嚴防續來北竄之賊爲要又豈能專顧宿州朕若指示一處將來正可藉口○以守城出力永廣江蘇六合縣學額二名○戊申諭內閣王茂蔭宋晉奏清查保甲完竣一摺五城保甲事宜本應時加查察見當巡防喫緊之際尤不可稍有疏忽既據王茂蔭等奏稱見已逐戶清查編造戶冊完竣嗣後著卽責成巡視五城及稽察各御史督飭所屬實力稽查毋許鬆懈○諭軍機大臣等昨據善祿奏臨清州城危在呼吸本日據勝保奏由油房鎮督兵前進一摺該匪攻擾臨清城紮立木壘三面圍撲雖經善祿崇恩等先後擊退惟兵力甚單賊勢

猖獗該州南門月城已被地雷轟陷暫用木柵欄護情形甚屬危急據勝保奏稱桂齡於初六日趕到與善祿會攻賊巢殲斃多名該逆仍堅匿不出州城尙未解圍殊深焦灼計該大臣刻下亦必馳抵臨清卽著與善祿等設法分路勦辦並與張亮基崇恩妥籌內外夾擊務將此股逆匪趕早殲擒萬勿令其窺伺西岸空虛或致奔突大名等處更滋蔓延仍隨時與僧格林沁載齡桂良互相知照聯絡聲勢斷不准耽延時日致干重罪將此由六百里加緊諭令知之○諭見在潁亳一帶土匪蜂起永城逆匪雖由正陽關奪船回竄六安等處難保其不去而復來和春等圍攻廬州固應迅圖克復但逆賊西繞六安乘機紛竄處處可以北犯大兵全力專注廬州而正陽關門戶洞開僅恃劉玉豹千餘兵勇豈能堵遏况和春等連日奏報並無圍攻之策不過賊出與之接仗賊歸卽



計無所施逆匪負嵎死守牽掣大兵無論郡城尙未攻克即使剋日攻破而六安霍邱潁上蒙城一帶任賊來往自如大軍全駐東南於大局仍難收拾和春等統領全軍豈不知時勢緩急但顧目前以重兵攻城而不計正陽關一路任賊往來紛紛北竄總不肯遽爲抽撥貽誤之罪其何能辭朕以皖省全局委之和春等並非專令株守廬州也本日已諭袁甲三由宿州進駐臨淮扼廬州東北之衝如賊由該處北竄惟袁甲三是問其西北一帶壽州霍邱正陽關等處卽著和春等添撥兵勇飭令秦定三管帶扼要防剿乘此逆賊回竄之時迅速前往妥爲布置不准稍有延緩秦定三抵正陽關後或應進攻六安或應沿河迎剿以分廬州賊勢並杜逆匪北竄之路均著隨時審度機宜向前截擊亦非令其專事防堵避難就易潁亳等處村集距正陽關均不甚遠所有剿辦土匪

亦可隨時聯絡河南兵勇就近夾擊袁甲三前在宿州與蒙臺較近今既進紮臨淮聲息稍遠而宿州鄉兵素與袁甲三相習仍可隨時知照互爲聲援若逆匪再由西面繞越北來秦定三不能以勦爲防朕必重治其罪諒該提督久歷戎行必不敢自存大意致蹈嚴刑也將此由六百里加緊諭知和春福濟並諭令秦定三知之○諭昨據袁甲三奏請派大員帶兵駐紮正陽關等語本日已諭知和春福濟令秦定三迅帶精兵卽日前往正陽關斷賊南北往來之路見在永城敗竄賊匪已由正陽關南竄六安該給事中追勦不及又因所帶鄉勇係宿州士民難以強之遠行仍欲折回宿州該州爲徐毫適中之地而臨淮爲前路要隘必須兼顧今正陽關一帶秦定三扼守可以杜賊竄突潁毫之路惟臨淮要隘僅有吉連李文安臧紆青等在彼防堵兵力尙覺單薄著袁甲

三卽帶得力兵勇迅速前往扼守臨淮督同該處防兵遏賊北竄  
儻有土匪勾結滋擾仍隨時派兵剿辦並可與秦定三劉玉豹聯  
絡聲勢俾廬州賊匪不敢北竄如賊由鳳陽左右分股渡河或擾  
及定遠均惟袁甲三是問至宿州壯勇應否撤回防守本處或畱  
若干名卽著袁甲三酌量布置毋稍疏虞該給事中仍須統籌全  
局不得株守臨淮幸賊蹤尙未及關謂可塞責也將此由六百里  
加緊諭令知之○僧格林沁等奏連日進剿獲勝情形得旨不過  
是小勝何日方能蕆事殊深焦急屢降嚴旨實無可再加若有心  
遲延朕卽將正月半以後嚴旨彙集閱看次第治汝應得之罪○  
庚戌諭軍機大臣等戶部奏遵議蘇松等屬漕米一摺蘇省漕糧  
爲京倉支放大宗原不准改行折色旣據該督等瀝陳辦漕陳手  
情形不能不量爲變通惟折漕銀兩專爲採買米糧之用見在京

倉存米無多若不急籌買補餉精憑何支發該省爲產米之區本年停運數十萬石地方卽多數十萬石之米如果實力妥籌不難卽時足額漕糧爲天庾正供該督撫身任封疆旣已貽誤於前若再不急籌補苴置京倉於不顧自問當得何罪怡良許乃釗接奉此旨著卽派委幹員如數採辦迅速由海船運赴天津務於五月以前放洋不准稍有遲誤除採買米石若干外所餘折色銀兩仍卽迅解部庫不得以軍需藉詞截畱並將見在辦理情形由驛先行馳奏此時京倉於盛京各處採買米石需費浩繁專待此項到京以資接濟儻米糧不能如期起運銀兩又不能作速解京朕惟有將該督撫等治以貽誤之罪決不寬貸戶部摺著鈔給閱看將此由六百里加緊諭令知之○諭前因賊竄臨清諭令僧格林沁迅由軍營挑撥馬隊一千名交德勒克色楞統帶前往勝保軍營

協勦茲據勝保奏稱初七日行抵臨清城外接仗殲斃數百名查  
勘臨清城外東西南三面俱爲賊踞該大臣見帶之兵不敷圍攻  
請添調官兵助勦等語此股南來逆匪意在援應阜城並有繞道  
北犯之意必須於前路厚集兵力遏其兇鋒見在京營各兵實難  
抽撥已諭令勝保先就見帶之兵相機籌辦著僧格林沁卽飭德  
勒克色楞剋日督帶馬隊一千名前往勝保軍營毋稍遲誤阜城  
距臨清甚近我軍兵力旣分難保該逆不潛通消息伺隙奔逃該  
大臣惟當趕緊設法籌攻迅圖蕙事本日據富興阿奏稱阜城見  
設長圍仍畱東面一路不知是否如此情形若果東面虛空亦恐  
該逆乘間衝突刻下軍情緊急如臨清之賊北竄惟勝保是問如  
阜城仍不能卽日克復以致賊匪突圍而出又滋蔓延惟僧格林  
沁是問此時勝保帶兵前進據稱接辦糧臺尙未有人著僧格林

沁仍飭暫革道員張起鵷迅赴勝保軍營以免貽誤至僧格林沁軍營官兵著卽統歸順天糧臺支應以昭畫一本日據巡防王大臣奏已撥內帑銀十萬兩迅速解往該大臣軍營矣將此由六百里加緊諭令知之○命副都統基溥侍郎李鈞左副都御史文彩內閣學士崇實辦理採買米石事宜○辛亥祀 先農親耕藉田○諭內閣張亮基奏攻勦逆匪獲勝一摺逆匪竄踞臨清州城外前經善祿崇恩督兵分路迎擊斃賊七八百名嗣經勝保馳抵該州卽日督隊進攻殺賊四五百名奪毀村莊二處茲據張亮基奏稱探知城外東南賊眾屯聚黑家莊地方該撫卽督率文武員弁選帶練勇於初七日夜間分路攻撲南北兩路之勇同時並至善祿崇恩亦派隊接應該逆正在聚食間我兵奮勇直前逆眾猝不及防登時驚潰其擊斃及焚死者不計其數冒火竄突之匪又復

紛紛自相踐踏我兵乘勝轉至東城根奪取礮臺立時將木城轟  
毀又殲斃逆匪多名生擒二十三名屍骸枕藉計其二千餘人逃  
出被脅難民亦有二千餘眾著勝保善祿張亮基等迅卽督飭各  
路兵勇奮力圍攻以遏兇鋒毋令延蔓○諭軍機大臣等張亮基  
奏夜襲賊巢大獲勝仗一摺見在逆匪圍踞臨清東西南三面眾  
至三四萬之多雖經剿殺多名兇鋒仍未大挫昨據勝保奏報已  
於初七日卯刻行抵臨清亦經獲有勝仗正可乘此聲勢合力進  
攻將此股逆匪迅速殲除絕其北竄之路所有南路土匪既有厲  
恩官帶兵見抵茌平李湘棻亦由蘭鄆山路徑赴沂州儘可責令  
分投剿辦該撫但當專意進攻與善祿等併力兜剿一切機宜隨  
時咨報勝保妥籌商辦另片奏因所屬失守城池自請嚴議等語  
該撫身任封疆致屬境城池屢遭蹂躪罪實難辭本日明降諭旨

僅將該撫交部議處以示薄懲該撫應如何激發天良知感知奮盡力勦賊稍贖前愆若但以土匪肆擾爲詞希圖避難就易或將臨清逆匪馳入直境遂謂本省無事朕必將張亮基從重治罪決不寬貸至莘縣冠縣朝城等處失事知縣被傷被害各情形均著確切查明並前此金鄉鉅野鄆城陽穀等縣如何失守地方文武如何下落一併覈實具奏分別辦理將此由六百里加緊諭令知之○轉潘曾瑩爲吏部左侍郎調何桂清爲吏部右侍郎彭蘊章爲禮部左侍郎李菡爲兵部左侍郎調王茂蔭爲兵部右侍郎翁心存爲戶部右侍郎以張祥河爲內閣學士並署吏部右侍郎前任陝西巡撫○實授許乃釗江蘇巡撫以齊承彥爲刑部右侍郎由左副都御史遷○壬子諭內閣昨據張亮基奏初七日督率兵勇於黑家莊地方勦匪獲勝本日據勝保奏該撫玩視軍務觀望逗留並欺飾圖



功各摺片覽奏曷勝駭異張亮基前由雲南巡撫調任湖南適聞賊竄長沙卽奏請防守常德擁兵折回並截畱長沙軍餉舉動乖方不知事勢緩急嗣經嚴飭赴省保守城池並辦理湖南湖北善後事宜尙有頭緒是以於署湖廣總督任內調令巡撫山東該員交卸時賊氛將近武昌並不將以前有無布置如何守禦情形詳細向吳文鎔告知輒卽趕緊渡江專爲自全之計迨抵河南卽以山東兵餉匱乏等詞入奏豫占地步朕已知其居心巧詐當經硃批訓飭該員應如何愧奮固守疆圻乃賊匪竄入東境疊陷各城以致臨清被圍重煩兵力猶不知趕赴城下與善祿崇恩內外夾擊由德州紆折回省繞道東平遷延不進至臨清後紮營八里莊距城遙遠經勝保咨商該員仍不移營前進亦不肯分撥練勇爲崇恩守城之助推諉取巧已堪痛恨復向黑家莊無賊地方空放

槍礮縱火焚燒閒房捏稱殺賊二千餘名冒功陳奏經該大臣查明該處並無殺賊痕迹據實奏參不知張亮基是何肺腑敢肆欺罔若將其卽行正法軍前亦屬罪所應得姑念其平日尙能辦理地方公事張亮基前已革職畱任著卽革任發往軍臺效力贖罪卽交勝保派員押解啟程不必再畱軍營俾軍務告竣後轉得希冀邀恩也○僧格林沁奏查阜城之賊自獨流靜海竄出經臣屢次痛加勦洗斃賊萬餘見雖困踞阜城該逆百戰之餘狡猾異常臣前與勝保合力勦辦統計馬步官兵三萬有奇未能剋期蕝事不意南賊復至勢不能不分兵堵截計先後撥兵一萬二千餘名兵分勢單地方遼闊堵禦頗形喫力數日以來連次極力進攻未能偏近賊巢屢蒙嚴諭切責惶恐無地臣受恩深重何敢有心遷延竇因無能以致仰勞聖慮惟有仰懇皇上天恩將臣從重

治罪 上諭軍機大臣等僧格林沁等奏調大礮並自請治罪各等語所有武成永固大礮並礮子火藥等件已諭巡防王大臣如數解往矣阜城逆賊窮蹙餘生即使堅匿死拒亦何至兼旬累月無計可施朕若欲加僧格林沁以罪原不難立降嚴旨卽見施行所以屢次訓諭不卽加罪者尙冀該大臣知感知奮迅速圖功乃此次忽以自請從重治罪等詞搪塞入奏豈謂有此一奏便可卸責耶抑將謂軍營勦辦遲延例應有此一請耶朕於該大臣倚任不爲不專相待不爲不恕遇有調槍調馬急需應用之處無不立予允准從未嘗稍形牽掣而一切辦理遲緩之處朕總詳細指示不肯遽加嚴譴該大臣乃稱非敢有心遲延實因無能所致試思有心遲延應得何罪該大臣豈能當之卽此無能二字已不應出之於口如各路統兵大臣人人皆以無能請罪國事孔艱更有何

人可任該大臣素性質直乃亦效此虛文殊不可解如果視朕疊次嚴旨爲具文故意遷延不能迅克阜城朕自能按律治罪不待僧格林沁之奏請也昨所諭東面合圍未密一節固係防賊竄突然合圍之道總須面面偏緊若但遠紮營盤遙施槍礮即使無隙可乘賊亦豈能坐斃見在南賊方張此股一日不除賊心終不肯死其中消息該大臣身在行間斷無不熟思計及也另片奏將寶坻縣監犯丁二成等畱營差遣之處著卽照所請行其各該州縣應照此辦理者亦諭知桂良將應行處決及發遣之犯卽行分別辦理勿令畱獄如情罪較輕而堪備驅策之犯卽照該大臣所請解營效力以杜奸萌將此由六百里加緊諭令知之○諭勝保奏擊賊情形並統籌大局一摺賊匪攻撲臨清守城兵勇單弱經該大臣挑派兵勇五百名排列馬隊護送入城協同守禦當將要截

賊匪殲斃多名惟賊眾兵寡該大臣一面就見有兵勇設法攻擊一面嚴催桂明所帶官兵並澤潞防兵迅卽前來酌量調遣桂明於初七日已抵祥符本日復諭令星馳就道不得藉口夫馬未齊致有耽延張亮基所帶練勇二千應歸何員管帶著勝保酌度派撥藉資協剿河北鎮總兵花里雅遜布前曾帶兵在直豫一帶剿辦賊匪見在河北並非喫緊該員所帶官兵是否可以檄調助剿著該大臣查明如果得力卽酌量調遣至前請添調馬隊早經諭令德勒克色楞統帶精銳一千名前往臨清計期亦應趕到所有各路官兵統歸勝保節制崇恩見已授爲巡撫該員經朕棄瑕錄用見復統轄全省地方正當力籌保衛州城埽除此股賊匪以報厚恩儻復意存自滿故蹈前愆或以軍務重大兵勇雲集諉之統帥爲避難就易之計恐不能如張亮基之輕予薄懲也著該大臣

傳旨諭知該撫合力同心內外夾擊一併與桂明張殿元歸該大臣節制所有前撥山東餉銀十萬兩並著傳旨崇恩飭令藩運各司迅速解交該大臣軍營以濟急需至該大臣統籌南北大局此時阜城逆匪負隅死守臨清復被圍擾務須兼籌熟計不得任賊東西分竄致與阜城之逆會合一切機宜該大臣隨時酌辦朕信任既專不爲遙制如有應行改絃更張之處該大臣見解所到不妨遇便奏聞惟北路及京營官兵已屬無可再調大江南北逆黨尙多誠不能不虞其陸續偷渡北竄節經嚴飭東南兩河總督並徐州鎮道扼守河口分派秦定三袁甲三駐紮臨淮正陽關等處遏賊北來見復嚴諭和春福濟兼顧淮北不得株守廬州一郡惟地勢則北重於南而賊眾則南多於北朕日盼該大臣迅將臨清逆匪掃蕩俾阜城窮寇無可希冀應援僧格林沁亦可辦理得手

卽會同統兵南下殄除羣兇拯救生民是所望於該大臣也將此由六百里加緊諭令知之○諭僧格林沁奏賊匪逼近各州縣監禁重犯請飭迅速辦理等語逆賊竄擾處所動輒開放獄囚藉作嚮導前因該逆北竄經桂良奏請將斬犯徐挺舉等卽行處決實屬權宜應變之法見在阜城之賊時思竄出而南來賊匪亦復逼近清河等處自應先事豫籌免令兇狡之徒轉爲賊用著桂良督飭司道將各州縣監禁各犯詳覈案情除斬絞重犯法無可貸者立即隨地正法外至情有可矜例不入秋審情實者卽予減等辦理應違徒者亦卽審結起解務期獄無畱滯以免疏虞至軍流以下各犯有年力精壯如天津監犯劉積德之力能殺賊者並著酌量收錄俾得效力行間立功贖罪固不可因有此旨將軍流以下人犯濫行寬縱亦不可因處決重犯轉致別滋事端將此由六百

里諭令知之○諭前因曾國藩督帶兵勇船礮需餉甚鉅曾降旨令裕瑞迅速籌款派員解楚本日據台湧奏孝感一帶賊勢披猖該督帶兵堵剿軍餉缺乏情形萬分窘迫等語已諭令駱秉章速行籌款以資接濟惟該省前經奏明存款無多不敷支發非鄰省趕緊協濟必致貽誤軍需著裕瑞接奉此旨卽迅速妥籌無論該省何款項下立即設法籌撥銀十萬兩派委妥員飛速解交湖北德安一帶台湧軍營並檄飭沿途小心護解毋得稍有疏忽將此由六百里加緊諭令知之○諭台湧奏孝感賊勢披猖並兵單餉乏各情江北雲夢應城兩處賊匪經台湧疊次剿敗退竄出湖惟孝感縣屬又有賊船闌入著該督卽就見有兵勇迅速相機迎剿堵賊竄路其潰口要隘往來逆船仍須及早剿洗務將此股逆匪掃除淨盡方能以次攻克漢口漢陽該督所稱兵力單薄自係實



在情形所有松潘建昌兩鎮官兵仍著派員迎提前進以資攻剿其竄往湖南賊眾據駱秉章等奏報節次截剿獲勝收復岳州府城惟該逆全數由洞庭湖下竄則鄂省大江南北均形喫重曾國藩統帶舟師於二月二十八日自長沙啟程跟蹤追剿自可扼賊後路並著台湧派員繞越迎催東下爲肅清江面之計斷不准青麐崇綸等擅行截留專事防守武昌致誤全省大局據該督奏稱省城兵勇爲數尙多足敷堵禦惟目下江路阻隔能否設法疏通與省城聯絡聲勢並著相機籌辦上游荆襄一帶仍應嚴密籌防勿致顧此失彼該督統轄全省惟當隨事酌度緩急安速辦理仍與駱秉章曾國藩等互爲聲援以期併力剿除勿令由岳州下竄逆蹤再滋延蔓將此由六百里加緊諭令知之○諭昨據舒倫保奏業已行抵潼關本日復據桂明奏遵旨渡河赴直隸一帶迎剿

見在永城夏邑逆匪已由豐縣渡黃擾及山東臨清其經徐州擊敗之賊復由正陽關一路竄回六安臨清距直隸僅隔運河而永城夏邑均已收復是以令桂明星夜渡河赴大名一帶迎剿此時歸德雖暫保無事而正陽等處兵力尙單儻逆匪去而復來河南仍形喫緊本日又據勝保奏請於汴梁添駐重兵所籌誠爲要著但就河南情形而論斷無可以添調之兵若將舒倫保防守潼關之兵移至豫省駐紮黃河南岸較爲近便於歸德徐州等處均可援應但舒倫保出境之後距陝較遠副都統常亮雙成又皆在軍營西安駐防官兵事務並無大員督辦且湖北逆賊經台湧擊敗後復有大股賊船四五百隻竄踞孝感縣屬之龍宮廟紅鸞渡一帶肆掠雖去潼關尙遠而商雒等處均與湖北毗連舒倫保能否分身亦難懸揣著舒倫保王慶雲卽行妥商陝西防堵如何布置

但期有可靠之人總以分兵赴豫策應爲要將此由六百里加緊各諭令知之○諭桂明奏督兵過河馳赴直隸迎剿一摺前因賊匪屯聚臨清州城外人數眾多我軍不敷防堵恐該逆匪由漳河等處直竄大名諭令桂明星速渡河馳赴大名一帶聽候勝保調遣茲閱桂明奏報於初七日行抵汴梁後至初十日尙未啟程渡河惟以飛飭前途豫備船隻車馬爲詞深恐遲延貽誤直省爲畿疆重地見在臨清賊匪逼近清河雖經勝保等獲有勝仗而兵力尙單儻該逆等同隙西竄大名一帶情形喫緊著桂明仍遵前旨督帶官兵飛速渡河於馳抵大名後聽候勝保調遣並沿途偵探賊情如有竄越卽盡力截剿萬不准以州縣供支車馬遲延藉口貽誤事機致干重罪將此由六百里加緊諭令知之○以崇恩爲山東巡撫鴈恩官爲山東布政使劉源灝署山東按察使

前署布政使

○前兵部尙書特登額卒予祭葬諡恭愼○癸丑諭軍機大臣等  
昨因勝保奏參張亮基欺飾冒功降旨將該員革任發往軍臺本  
日據張亮基奏初九日派委員陳韜等整隊出擊進至東南沙灘  
設法誘敵陳韜手刃賊目一名我軍乘勢掩殺斬擒無算並生擒  
偽總制曹成等五名其斃賊千餘名等語所奏是否飾詞欺罔希  
圖掩過邀功著勝保善祿崇恩迅卽查明據實具奏行軍之道首  
貴賞罰嚴明旣據稱殺賊千餘名且兵勇亦有陣亡受傷如果是  
日打仗獲勝自必共見共聞張亮基已身獲重罪其出力員弁亦  
不可沒其勞績該大臣亦毋得因有前奏稍存回護本日復據桂  
良奏開州拏獲奸匪有逆匪催令後起由蘭儀渡河之語已諭令  
王履謙長臻楊以增英桂等嚴防河岸並著崇恩飭屬一體嚴防  
毋稍疏懈臨清逆匪又成負隅之勢該大臣務當激勵將士督率

兵勇迅速設法內外夾攻毋再延緩致干重罪張亮基摺著鈔給閱看將此由六百里加緊諭令知之○甲寅諭內閣前臺灣道徐宗幹與該總兵恆裕辦理土匪意見不合徐宗幹藉詞稱病當將該鎮道交部議處並著有鳳王懿德密查具奏茲據奏稱臺灣鎮總兵恆裕辦事竭蹶性情偏執臺灣道徐宗幹藉詞引退不免推諉均未便再畱本任致滋貽誤恆裕著送部引見徐宗幹已升福建按察使著卽撤任仍交王懿德察看具奏○諭軍機大臣等黃河天塹爲南北關鍵之區節經嚴諭巡河督撫及近河一帶管轄各地方官加意防範及逆匪北來仍令偷越殊堪痛恨昨據桂良馳奏開州拏獲奸匪並張殿元所報該逆竟有催令後起各賊欲由蘭儀渡河北犯之說本日勝保奏報情亦相同並據逆供見來之賊係僞西王派來尙有僞翼王僞東王所派見尙未到等語是

逆黨眾多欲謀渡黃者已非一起朕前此早經料及是以疊次諭令百勝王夢齡嚴防陸續偷渡昨又諭令長臻王履謙楊以增英桂一體巡緝惟賊情詭譎異常或故作此虛聲使我兵專注蘭儀一路仍催趙後隊由豐工下游續行竄越均屬不可不防勝保請防蟠龍集等處未爲無見該處係皖匪從前經過之地著百勝等懍遵疊次諭旨嚴飭文武員弁實力邀擊不得任令賊匪渡河又蹈覆轍朕於百勝等業經諄諭再三若再疏懈惟有執法從事勿謂徐州前路已有秦定三袁甲三等在彼堵遏百勝等遂得再邀寬宥也將此由六百里加緊傳諭知之○以瑞璜爲福建按察使

由臺海  
道遷

○乙卯予福建陣亡在籍員外郎楊繼勳等祭葬世職○

丙辰諭內閣勝保奏進攻獲勝大挫賊鋒一摺逆賊竄擾臨清地方於該州城外東西兩面紮立木壘意圖抗拒經勝保於十二日

督兵進攻州城東北之林家園賊巢各隊兵勇爭先攻撲當將鹿角柵拉開賊眾情急紛紛逃出木城東面復擁出二三千人前來接應我兵排列隊伍施放連環槍礮立斃賊匪一百餘人該逆敗退回巢勝保復於十四日寅刻派令副都統常亮等帶隊前行直攻州城西北之彌陀寺該大臣親督馬隊官兵隨後繼進逆眾傾巢出拒官軍整隊相迎用連環槍礮擊斃賊匪一百餘人該逆抵死不退我兵奮力合擊無不一以當百賊眾披靡勝保復令開放神威礮及隨帶二千斤鐵礮向賊隊轟擊立見賊旗紛紛倒地賊黨抱屍潰奔兵勇乘勢追殺復斃賊無數餘匪隨入壘中我兵卽時趕到該逆未及開放槍礮大兵一擁而進撲入濠牆復拋擲火彈將該逆火藥簍引燒賊眾自亂士卒勇氣百倍刀矛並舉復殺斃賊匪數百人餘賊伏匿濠內百計抵禦我兵放火焚燒將濠內

之賊盡行燒斃屍與濠平其西關之賊擁出千餘奔救復經馬隊官兵馳往截殺斃賊一百餘名餘賊敗退其計殺賊一千三百餘名斬獲首級二百餘顆生擒五十餘名奪獲大洋鐵礮二尊擡槍鳥槍刀矛器械戰鼓火藥鉛丸黃邊風帽大小黃旗無算其東北一帶亦經善祿督兵進攻遏其救應之路賊眾撲出我兵開放槍礮殺賊多名並將餘賊擊回使該逆東西不能相救此次攻破賊巢大獲勝仗勦辦尙爲得手著勝保迅卽乘此聲威督令帶兵各員一鼓作氣務將此股逆黨就地埽除仍嚴飭崇恩在城協力守禦內外夾攻以期殄滅淨盡毋令窮蹙分竄再滋蔓延○諭桂良奏參帶兵官員不能約束兵丁一摺委散秩大臣穆輅健銳營翼長雙禧管帶京營官兵赴清河威縣一帶防勦逆匪乃於經過地方並不能嚴行約束以致該兵丁等沿途騷擾膽敢搶劫衣物傷



斃人命並有毆傷官弁情事實屬大干法紀著桂良迅卽飭屬將滋事兵丁按名提省詢明後卽行正法以肅軍律仍一面派員前往安撫居民妥爲彈壓穆輅雙禧均著先行摘去頂帶交部嚴加議處仍暫畱勝保軍營戴罪自效儻再不知奮勉著卽嚴參治罪所有穆輅雙禧原帶官兵並著勝保卽行另委得力武職大員管帶毋稍遲誤○和春等奏連日圍剿廬州擊賊獲勝情形得旨連日接仗斃賊不過五六百傷亡兵勇亦不少可見並未得手尙如是鋪張何爲耶續有屢次寄諭嚴旨令汝等兼籌北路扼竄以固全局看來廬州實無克復之機此時移緩救急最爲上策亦非俾汝等避難就易藉口耽延○予安徽陣亡副將戴文蘭已革布政使李本仁等山東陣亡知縣張應蘭祭葬世職○丁巳諭內閣全慶朱嶠奏運河隄工缺口請飭籌辦一摺上年秋間北運河上游

北寺莊地方河隄被水衝缺見在海運米石將抵天津轉運所關  
自應趕緊堵築以利漕行著桂良派委委員詳細估勘迅籌辦理  
毋稍遲誤○諭軍機大臣等前因張亮基奏初九日出隊獲勝斃  
賊千餘名當經諭令勝保善祿崇恩據實查明是否欺飾尙未據  
該大臣等覆奏本日復據張亮基奏稱連日進攻每次斃賊數十  
人十四日又轟斃賊目並餘賊數十人復在楊家橋一帶親督勇  
目李朝俊手刃穿黃段馬褂賊目一名係僞冬官副丞相許姓勇  
目馬進科手刃穿紅衣賊目一名係僞檢點郭姓奪獲大旗及黃  
旗擡礮刀矛雜械不計其數乘勝將九家村蔡家村兩處賊巢燒  
毀約計斃賊二千餘人等語所奏是否鋪張入告攘功自居仍著  
勝保善祿崇恩秉公確查據實具奏不得以參奏在先稍存回護  
張亮基原帶練勇二千人諒已遵旨派員管帶以資攻勦張亮基

東已發遣該勇等必須統帶得人方可隨時驅策見在大兵雲集  
德勒克色楞所帶馬隊計亦到營著勝保卽督飭各路員弁兵勇  
乘勝進攻出奇直擣賊巢與崇恩設法內外夾攻務期悉數殄滅  
不准稍稽時日儻再藉詞延宕惟有執法從事決不寬貸也將此  
由六百里加緊諭令知之○曾國藩奏臣自靖港甯鄉新康三獲  
勝仗後卽令各營馳赴湘陰截剿賊聞官兵水陸大至當卽退出  
湘陰探悉西湖口賊船尙多當派五品頂翎張宏邦等駛駕礮船  
迎擊轟斃賊匪數十名燒毀賊船十餘隻守備褚殿元等三營其  
奪獲賊船十隻勇目黃忠等復在團山地方奪獲賊船逆黨屢經  
懲創全數竄逃岳州亦已退出臣前派之陸路各營二月二十五  
六等日先後抵岳臣亦督帶水軍於三月初二日行抵岳州查洞  
庭湖周回八百里港汊紛歧最易藏奸全湖入江之所名曰荊河

上游爲慈利荊州其虎渡河等處多與湖水相通屢獲賊探供稱賊內藏湖汊外竄荊河俟官軍東下再在上游滋擾等語臣見駐岳州多派哨船分巡內則哨探湖中港汊外則哨探荊河以上必須逐處搜查上游肅清然後壹意東下至陸路各軍屢據稟報崇陽通城先後失守臣已札飭貴東道胡林翼等帶勇千餘前往剿辦若能乘臣在岳時就近將崇通股匪辦有頭緒則馳赴下游可無彼此牽掣之患 上諭前據駱秉章奏收復岳州賊船下竄曾

國藩已由長沙省城跟蹤追剿當經諭令台湧派員提催不准青麐等截畱原以楚南道路雖通楚北賊氛尙熾必須乘勝東下將漢江一帶賊匪全行殲滅以次肅清長江爲埽蕩東南之計非謂岳城旣復即可置北省爲緩圖也本日據曾國藩奏搜捕湖汊並剿辦崇通股匪各情是水軍雖已抵岳而馳赴下游尙無確期見

在湖北賊情喫緊不但漢口漢陽亟應克復卽孝感等處亦豈宜久任狁狁况雲夢應城退竄之賊尙在漢口上下盤旋台湧兵力過單未能兼顧襄陽武勝均屬扼要之區旣未便移營助剿其前調松潘建昌兩鎮官兵迄無抵荆消息佈克慎所帶東路弁兵數止千名卽陸元烺派撥羅玉斌管帶之防兵五百名全到湖北仍須有水路礮船方能夾擊據官文貴陞所奏荆河已有逆匪船隻該處守城兵僅八百名沿河沙市梭緝之馬步隊各兵亦不過千餘鄂省兵勇如此單弱豈可仍在上游遲滯著懷遵前次諭旨迅赴湖北先清江漢與台湧等聯絡聲威毋再延緩其湖汊藏匿餘匪想已無多著駱秉章嚴飭地方文武實力搜捕崇陽通城各匪盤踞未久當易撲滅著卽飭胡林翼等分投勦辦曾國藩所統水勇旣不准青麐等畱守武昌若駱秉章欲藉曾國藩爲保障任意

牽畱朕亦不能寬宥也將此由六百里加緊各諭令知之○戊午  
諭軍機大臣等勝保崇恩先後馳奏逆匪於本月十五日夜復用  
地雷轟陷臨清州城各一摺覽奏曷勝憤懣逆匪自竄入東境金  
鄉等縣疊遭蹂躪茲復攻陷臨清大肆猖獗該處爲水路總匯幾  
於防不勝防儻該逆乘勢北犯雖有勝保等督兵極力阻遏而賊  
眾兵單勢難分投堵截刻下阜城之賊業經挖濠圍困因該逆堅  
匿不出竟致一籌莫展無計可施前據勝保奏曾調宛平房山兩  
縣煤窯匠役於阜城東北村內令其開挖地道以便暗用地雷功  
尚未就密交慶祺妥辦未知究竟如何逆賊屢次攻陷城垣俱用  
地雷是其慣技何以我兵竟不能以此破賊僧格林沁務當通盤  
籌畫卽將阜城餘匪設計殲除如能迅速奏功則督兵直赴臨清  
會剿非但可爲勝保援應實所以保全大局儻蔽事稍遲致該逆

潛通消息或有句連必致更難措手見已令王明等解礮赴營計日可到僧格林沁自王家口追賊屢次獲勝洵屬奮勉何以抵阜城後勞師糜餉至於此極朕實不解時事至此猶不甞勉圖功迅速蔽事以顧全局該大臣平日以忠直自詡者固如是乎僧格林沁接奉此旨後應如何設法進攻直擣賊巢爲移兵赴援之計使逆匪不得句結爲患籌畫萬全迅速具奏方不負朕倚任之恩也將此由六百里加緊諭令知之○諭本日據崇恩勝保先後奏稱逆匪用地雷轟陷臨清州城各一摺覽奏曷勝憤懣逆匪竄踞臨清城外經該大臣督兵進剿屢獲勝仗復添派兵勇入城助守且該州北門外並無賊匪儘可內外策應何至任賊復用地雷轟陷城池勝保善祿統領重兵救援州城豈得以無守土之責藉詞諉卸崇恩本在城內不知督率文武兵民同心固守輒至城外勝保

軍營意圖趨避致令闔城生靈慘遭荼毒該大臣等貽誤之罪均無可辭臨清州城糧米軍械頗多逆匪勢必負隅久踞桂明行過蘭儀計日可到德勒克色楞已帶兵抵營著該大臣等卽督飭官兵設法進剿迅將城外賊壘盡數剷除勿令該逆恃爲犄角庶可四面兜圍亟圖克復逆匪詭譎異常且意在救援阜城之賊勝保統領全軍尤應防其水陸北竄其東昌濟南一帶卽責令崇恩嚴飭地方文武妥爲布置該大臣等務當迅圖進剿以贖前愆儻不知奮勉致此股逆匪久踞臨清或肆行竄擾國法具在豈能屢邀寬典耶城中文武下落及張亮基所奏勝仗著迅速查明據實具奏將此由六百里加緊諭知勝保並諭令德勒克色楞善祿崇恩知之○以臨清被賊攻陷革欽差大臣正藍旗漢軍都統勝保綏遠城將軍善祿山東巡撫崇恩職命剿賊自效○己未諭內閣惠



親王恭親王奕訢親王銜定郡王載銓奏試鑄鐵錢有效請旨辦理一摺見在戶工二局所鑄大錢業已暢行更得鐵錢相輔國用民生當可益臻饒裕著惠親王等悉心詳定章程添鑄鼓鑄總期與見用銅錢並行不滯所擬設廠安鑪各款均照所議辦理○諭勝保代遞編修李載熙封奏時事十二條朕詳加披覽雖係按切時勢並無籌辦之法其尙堪採擇之處如請於近京要地屯紮重兵天津兵勇勤於操練及儲備糧食各條較有實際業已早見施行至所稱督撫但保省垣州縣但顧城池請嚴定入境越境罪名一條地方文武於賊匪竄擾之時若但知株守一城任賊過境斷不能因其並未失陷城池稍從末減著帶兵大臣及各省督撫於賊蹤闖入處所覈實嚴查隨時參奏不得遲延疏漏致不肖官吏得以掩飾彌縫倖逃重罪其堅壁清野一條原爲民間自爲捍衛

朕諄諄誥誡至再至三遇有辦理得力之員破格超遷者亦復不  
少該編修所請妥議建築碣堡章程著各省督撫嚴飭地方官紳  
各就本地情形斟酌妥辦實力舉行不得有名無實視爲具文至  
中外大小官員狃於積習巧飾因循弊端百出寔堪痛恨雖屢降  
嚴旨力加整頓四載於茲尙未能盡革頽風當此時事孔艱爾大  
小臣工尙復不知振作洗刷精神食祿苟安天良安在其所稱下  
罪己以激忠義一滿漢以示大公一事權以重責成求賢才以支  
大廈類皆空言激論無補時艱朕卽位之初下詔求賢廣開言路  
復特頒手詔痛戒因循原期中外臣工咸喻朕孜孜求治之至意  
力挽積習以副委任總之事事惟求實際並不願以言感人崇尙  
虛文也滿漢臣工從未嘗稍存歧視委任將帥簡畀封疆亦皆信  
任勿疑何至事權不一至所稱由科第出身者讀書明理斷不至

或生異心卽他途入仕之人亦應稍知臣節稔知利害何至甘心從逆自取滅亡覽奏殊堪詫異朕賞功罰罪一秉大公該編修之奏何由而出此委係心有所疑故爲此語徒博虛文又所稱酌用挑賣井水之夫稽察奸慝一條尤屬不成事體可笑之至其餘所稱亦多窒礙均毋庸議該編修本無言事之責所請又非機密重情輒遞封章並以記名御史列銜實屬有乖體制嗣後不應奏事之員有必須上陳事件仍著懷遵前旨具呈本管官代奏不得率行封口致違定例○以譚廷襄爲山東按察使由兩淮鹽運使遷○庚申諭內閣自逆匪竄擾以來所過州縣村莊無不慘遭蹂躪曾經疊降諭旨令各省紳民辦理團練既可保衛身家又可隨同官兵勦賊近月以來屢覽軍營奏報各該處紳民人等或殺賊被害或殉節捐軀實屬深明大義均堪憫惻著各路統兵大臣暨各該督撫

等迅速查明凡逆匪經過地方鄉團紳民人等有能奮勇剿賊者隨時分別保奏朕必立加優獎其陣亡鄉勇除隨同官兵打仗例得請卹外其有激於義憤殺賊隕身者無論防剿逆賊土匪悉准令紳民於各該地方建立總坊一併題名並從祀各州縣忠義祠以昭激勸將此通諭知之○諭和春福濟奏督兵進剿連獲勝仗一摺自二月初四日該提督等移營三里岡之後疊據奏報均經獲有勝仗每次殲斃逆匪自一千數百名至三四百名不等本日復據奏稱本月初十日派撥兵勇分門進攻和春與秦定三往來督戰福濟帶領官兵各路接應該逆突於北門衝出五六千人勢甚兇猛官兵分三路迎擊全玉貴親督中路官兵左路鄭魁士右路江忠信復分投鈔襲熱河宣化密雲吉林各兵併力向前擊賊賊眾大敗潰奔入城十三日北門逆匪復乘官兵開空營盤突出

四五千人大直前攻撲秦定三一面於營內連放大礮一面出營攻擊和春復飭鄭魁士等由後路鈔襲會合一處併力攻剿斃賊無數該逆復從東門撲出千餘人意在乘虛窺伺福濟當飭遊擊嵩瑞等直前迎剿斃賊數十名統計兩日奪獲旗幟礮械鉛藥等項不下四五百件廬州逆匪連次被剿勢已漸蹙復經此次痛創逆膽已寒著和春福濟迅卽督飭兵勇克復郡城毋再遷延時日總兵全玉貴守備江忠信等均能不避矢石身受重傷實屬奮勇可嘉果能始終出力迅奏膚功朕必加以懋賞逾格施恩也○諭崇綸青麐奏武昌擊賊獲勝一摺賊匪盤踞漢陽漢口一帶疊經崇綸等督令兵勇焚毀江面賊船多隻先後斃賊無算該逆復於初四日游駛渡至半江卽經已革總兵楊昌泗出隊迎剿崇綸等登城督飭兵勇施放連環槍礮逆賊頭船膽敢冒死登岸經崇綸等

飛調川勇截殺立斃長髮賊二百餘人割取首級十餘顆奪獲器械多件江面各船亦被槍礮擊燬多隻其漢陽以上鸚鵡洲賊船亦經遊擊侯鳳岐千總陳慶有用礮船全行擊退初五日復經崇綸青譽密飭侯鳳岐等督帶大小礮船渡江直撲對岸賊船連放火箭火彈賊眾驚潰撲水溺斃者甚多兩次水陸合擊剿辦尙屬得手卽著青譽會同崇綸嚴飭帶兵員弁併力進攻以殄妖氛所有在事出力人員並准酌量保奏毋許冒濫○袁甲三奏臣因追剿北竄粵匪不及折回南路聞阜亳一帶捻匪四起卽於三月初四日馳赴王市集一帶沿途居民泣訴粵匪蠶擾後突有捻匪糾約嘯聚到處響應尋常安業農民亦往往十數成羣闌阻短搶捻匪到處尋殺豎有太平天國金四正將軍旗號內有總頭兩人張捷三僞稱太平順天王王導人卽王得愚僞稱兵部大都督糾約

永亳蒙一帶及外來各捻頭合爲大股以義門集爲總巢以臨湖鋪爲分窟該匪聲言初六日焚燒張村鋪臣卽日趕到張村鋪該處距臨湖鋪三十里初五日飭派同知朱經屏縣丞徐曉峯參將朱連泰等督帶兵勇趕赴臨湖鋪出其不意直擣巢穴該集南而靠湖中通一路我兵先於湖路要口安設槍礮另行分兵繞湖而走直抵該集該匪望見官兵大至且南面地利已爲我據卽出隊三千餘人於集北豫備抵敵兵勇一擁向前撲進賊隊該匪遂四路奔竄我兵追趕十餘里斃賊三百餘人天晚收隊次日該匪仍竄歸義門集臣卽於初八日帶兵進逼匪巢探聞雉河集與義門集捻匪聲息相通初九日整隊直進雉河集該集有捻匪千餘人聞臣將到先於是夜逃歸義門集臣查雉河距義門四十里該匪既有畏心臣若駐紮雉河則該匪懾於聲勢必不敢拒敵暫行解

散俟臣去復聚一時難以措手因留兵勇二千名臣帶兵勇數百聲言移紮臨渙集行至二十里外之龍山集卽令隨帶兵勇仍潛回雉河並先期飭調駐防臨渙之忠壯練勇七百名於是晚趕赴雉河該匪果於是夜五更自義門集前來由雉河西南直撲雉河行營兵勇整隊迎敵至馬家樓地方見匪眾排陣十餘里約近萬人蠶擁來撲我兵分三路迎擊該匪槍礮極多子落如雨兵勇冒煙施放連環槍礮與匪對擊且擊且進逼近賊隊該匪抵死不退復於南北兩頭另分兩股向我兵鈔襲而來意圖圍裹兵勇仍各按各營分路撲擊自辰至午鏖戰兩時之久人人奮勇爭先斃賊二百餘名該匪力不能支始向後撤動其所排隊伍仍未甚亂且戰且退故作誘我之勢兵勇先探明路程知其並無埋伏奮力窮追計二十餘里斃賊六七百名內有乘馬執旗捻首二十餘名至



渦河渡口該匪爭渡除自相踐踏及落河淹斃不計外復擊殺一百餘名生擒十三名仍收隊回雉河集行營查該匪等於粵匪過後膽敢豎旗稱王乘機倡亂並張貼偽示逆迹已屬昭著據生擒各犯同供該匪等總頭僞兵部大都督王導人及分股大頭目僞太保朱添寶僞前營將軍孫禿子等十餘人除李白李學身受重傷不知存亡王鵝孫五雷乘間脫逃外餘俱於打仗時殺斃又僞東路總兵夏拴僞西路總兵尹球僞北路總兵尹齡僞中路總兵劉老淵等均已被殺惟僞南路總兵劉狗係看守義門集賊營因聞賊匪大敗即將所掠財物席捲先逃嗣敗匪回集聞知追趕互相殺傷未知存亡至總頭僞太平順天王張捷三或以爲頂上受傷甚重或以爲業經身死容卽確查見探聞義門賊巢已無賊蹤餘匪藏匿寺兒集觀音堂等處爲數無多已飭兵勇進駐義門集

設法搜剿以清餘孽並聞永城以南之皮家集蘇家閣一帶另股大捻亦被徐廣縉派兵剿敗斃賊甚多兇已專函知會如能合兵一處更可一氣埽蕩此次以三千餘名兵勇擊敗狂寇萬人首要多已就戮匪眾聞而膽寒該文武督率有方士卒亦勇敢用命容臣查明出力等第另行保奏 上諭安徽潁州各屬捻匪糾約嘯

聚僞託粵賊暨旗謀亂經袁甲三趕到出其不意直擣巢穴殺賊不計其數義門賊巢剿洗一空該給事中督辦有方所有在事出力員弁團練紳民准酌量保奏見在徐廣縉已將永城以南皮家集蘇家閣一帶捻匪剿敗著該給事中知會聯絡搜捕餘匪務期淨盡勿畱餘孽○諭軍機大臣等勝保奏十七日進攻賊壘殺賊情形一摺前因臨清失守將勝保等革職責令迅圖克復該大臣前奏反復辯論總以並無守土之責爲詞尙謂不分畛域迥非平

日勇於自任所向無前氣象姑予薄責不卽加罪原冀其稍知愧  
奮刻卽圖功乃本日所奏十七日進攻東面賊壘不過斃賊二百  
餘名追將濠內賊匪全數殲斃亦未將賊壘及時攻奪空言積憤  
於事何濟且據稱城內倉廩及積糧處所均爲知州張積功都司  
武殿魁焚燬該逆失望仍分聚城外關廂是城中賊匪無多所賴  
關廂村莊爲犄角之勢若不趕緊設法將城外賊巢盡行平毀使  
該逆不能互相援應則州城終難克復頓兵日久師老力疲又必  
復蹈故轍勢將不可收拾桂明於十八日已抵大名仍著勝保飛  
調到營並分催各處大礮迅速運到查照前降諭旨另派得力大  
員將雙禧穆輅之兵迎提統帶酌量地方駐守扼賊竄路計各路  
徵調之兵將次到齊德勒克色楞崇恩分駐西南及東路其東南  
一路必應顧及況東昌郡城亦商賈輻輳素稱饒裕之區豈可稍

有疏失必俟該逆竄往再籌盡力追擊已落後著前諭以李湘棻業經由沂州折回卽令防守豐工蟠龍集一帶厲恩官帶兵北行卽飭馳赴東昌該大臣可以就近調遣察其兵力是否足資扼截令卽堵守臨清東南之路總之該大臣固當嚴扼賊匪北竄仍須面面兼顧迅卽力圖攻剿收復州城毋再遲延致干重典琦善奏賊匪假冒官兵各情不可不嚴加查察以免墮賊奸計原片著鈔給閱看將此由六百里加緊諭知勝保並諭令德勒克色楞善祿崇恩知之○諭琦善奏三汊河官兵未能撤回山東並勦毀老河影泗源溝匪巢各摺片見在賊陷臨清所調各路官兵將次到齊已令勝保等盡力攻剿迅圖克復若俟山東官兵調回亦屬緩不濟急且淮北情形喫重雖有袁甲三秦定三分駐臨淮正陽仍令和春福濟統籌兼顧力杜逆匪北竄所有河州西甯官兵未必能

調赴揚州其張亮基請調回山東官兵亦著毋庸調回仍畱三汊河交琦善調遣此項山東兵前據張亮基奏據該勇等稟稱日久並未見仗情切思歸見經仍畱汝營能否奮勉殊難豫料著隨時激勵用之逆匪竄踞瓜州爲日已久豈不能迅速掃除稍紓朕南顧之憂耶其老河影泗源溝兩處梟匪此次大加勦捕辦理尙屬得手著該大臣嚴飭李志和等趁此聲威掃除淨盡勿畱餘孽至江面艇船並著隨時調度水陸合擊前據葉名琛奏廣東雇備之紅單礮船已飭令陸續放洋此項船隻一入長江更可助勦得力矣將此由六百里加緊諭令知之○諭向榮奏金陵疊次籌攻請調廣東福建官兵助勦並鎮江兩次攻勦情形各等語見在阜城逆匪未除皖豫之賊復由豐工渡河連破金鄉等處直竄臨清本月十五日夜間州城失守北路情形萬分緊急惟望金陵及早收

復埽穴擒渠茲聞向榮奏報金陵疊次籌攻均未得手鎮江亦不得謂之勝仗該大臣務當先就見有兵勇設法進攻將金陵及鎮江城池次第速籌收復則皖豫賊匪有所牽制自不至續行北竄北路剿辦較易爲力向榮身膺重寄具有天良豈得藉口兵單聽大局之敗壞致干重罪將此由六百里加緊諭令知之○諭昨據崇綸青麐等奏武昌連日擊賊獲勝一摺漢陽漢口一帶逆鯨遊駛江面意圖直撲武昌此次水陸交戰尙能稍挫賊鋒省城見在兵勇約有萬餘兵力不爲單弱青麐等惟當鼓舞士氣激勵民心一面妥籌守禦一面設法剿洗乃屢次奏報總以外援不至爲詞且以台湧未能由德安分兵到省徒深焦灼該撫等止知顧一省垣其江北肆擾股匪豈可置之不辦耶台湧隨營兵勇收合堵城殘敗不過二千餘名以之分剿雲夢應城孝感等處賊眾僅能以

少擊多萬一趨兵南下而該逆伺隙北窺全局所關與武昌一省孰輕孰重況江面全爲賊踞該督又豈能飛越而渡卽令統此二千兵勇全數赴鄂視省中見有官兵所增亦屬無幾青麐等於軍情緩急機宜何不加忖度如此朕統籌大局總以肅清江面爲要但使江路一通不獨武昌南北兩岸聯爲一氣卽上下游紛竄逆匪亦易於次第殲除台湧節制兩湖無論何路勦匪事宜均應熟籌兼顧相機而行荊州一帶籌防是否嚴密孝感漢陽等處如何督率進攻佈克慎以獲咎大員特恩派令戴罪殺賊著卽飭令分投進剿以期稍贖前愆本日青麐單銜奏報亦不過滯陳勦辦逆匪之難毫無實濟見值賊匪猖獗處處勦辦皆屬緊要豈獨武昌然耶青麐身任巡撫責無旁貸崇綸係特畱幫辦防剿之員亦豈能置身事外務卽審度事勢堵剿兼籌仍設法與台湧聯絡聲援

及早埽蕩儻稍有疏虞或藉詞豫爲諉卸地步朕必重治其罪決不寬貸至屢次奏稱所發摺件均未接到諭旨著台湧迅速就近飭查是否驛遞遲延青麐亦當設法差人迎提飭催豈能晏坐以待致誤事機將此由六百里加緊諭知台湧青麐並諭令崇綸知之○諭和春福濟奏連日進剿獲勝一摺此時克復郡城固爲該提督等專責而逆匪攻陷山東臨清扼賊續竄尤關緊要前經屢降諭旨令和春等撥兵交秦定三迅赴正陽關霍邱一帶嚴杜賊匪北竄之路並令袁甲三進駐臨淮以遏東北賊衝諒和春等接奉前旨必不敢遷延遲誤本日據袁甲三奏遵旨馳赴臨淮摺內有探聞霍邱土匪倡該縣剿捕被害僅有典史閉門固守之語如果屬實則霍邱危在呼吸儻逆匪乘釁勾結勢必不守該縣與六安接壤爲正陽關之犄角此處一有疏虞則正陽關亦難固守



見據和春等奏報勝仗秦定三尙在行間是直坐擁重兵竟置全局於不顧著卽派撥兵勇迅交秦定三剋日統帶啟程不准稍有耽延儻令逆蹤再有竄越或致六安之賊竄及霍邱彼時再以正陽難守爲詞朕不但將秦定三立正軍法卽和春福濟亦必從重治罪見在六安舒城桐城安慶等處逆匪均不甚多止因大兵專顧廬州人無固志以致逆匪肆意往來若秦定三移兵正陽或援霍邱或攻六安時時出賊不意懾以兵威不但賊難他竄卽廬城攻剿亦較易得手前有旨令青州副都統常清將所帶青州駐防兵進紮黃河兩岸本日據向榮奏已於初八日派貴州兵一千名前往徐州自係未知秦定三進防正陽此項官兵若徑赴徐州道路又形紆折著和春等飛提迎催卽交秦定三統帶但不可坐待此兵致誤事機仍著先撥官兵數千迅令秦定三馳往不准稍有

遲延又據琦善奏逆匪改換服色希圖他竄等語著和春等隨處盤查嚴加防範毋墮該逆詭計原片著鈔給閱看將此由六百里加緊諭知和春福濟並諭秦定三知之○袁甲三奏查臨淮爲水陸要路賊之窺臨淮無異於窺正陽因臨淮有備而正陽無備且六安又爲捷徑所以旁竄耳見在自淮以南鳳定土匪大肆猖獗臣擬到臨後卽行分兵勦辦臨淮至正陽爲鹽船必由之路近因粵逆竄擾上自六安下至懷遠沿河皆爲土匪盤踞商賈無路可通臣到臨後必當竭盡心力疏通河道然正陽一有阻滯下游徒勞罔功至於正陽以南由六安至舒桐安慶等城逆匪並不甚多亦未踞守城池民間蓄髮者頗多含垢忍辱爲苟延性命之計此時正陽駐紮重兵一面防賊北竄一面布置進攻舒六與廬州作接應之勢風聲所到賊有戒心且百姓聞之亦生感奮同仇禦侮

必有可爲內應者至賊蹤未到之區聞霍邱縣土匪猖獗該縣與六安聲息相通儻逆賊乘亂而至霍邱一失直達潁郡則皖豫楚處處可通正陽亦不能守矣見奉旨派秦定三扼守正陽必須多帶精兵與劉玉豹會合一處且防且剿以收民心而分賊勢駐防陳州之牛鑑亦宜進駐潁州以壯聲威庶北竄門戶處處聯絡臣駐守臨淮遙作各路聲援如有可進之機亦卽酌量前進斷不敢一隅株守自倖無罪總之六安來路旣扼不惟潁郡無虞豫省歸陳及宿徐以北均可無虞臣思慮所及不敢稍存畛域伏祈聖明垂察上諭皖省情形敗壞至此專恃廬州城外一軍卽使計日克復亦已驟難收拾該給事中所奏援潁郡以固正陽實係緊要關鍵袁甲三見辦捻匪如大致已定卽應迅赴臨淮該處距宿州不遠聲勢儘可聯絡鳳陽定遠等處土匪均著隨地剿辦亦不

必專駐臨淮致成株守至淮河上下如何設法疏通總當力籌安  
辦不得諉之正陽阻滯下游徒勞無功也見據和春等奏已飭署  
臬司恩錫督帶兵勇前赴臨淮所帶之兵究係若干就見在情形  
而論似臨淮之兵多於正陽而正陽之防重於臨淮該給事中既  
能統籌全局即可與秦定三和衷商榷互相策應據稱近日正陽  
關以南民情被賊煽誘竟至有甘心從逆之輩總由安慶舒桐六  
安一帶官兵不能兼顧土匪乘機勾結以致脅從日久幾與逆匪  
相安此時惟有力遏廬州臨淮正陽霍邱等處要隘以圖進攻大  
軍風聲所到不特杜賊北竄卽從逆匪徒亦可聞風稍爲斂迹轉  
移之術惟在隨時相機籌辦不可諉之時事難爲也至奸細接濟  
廬州之賊必應嚴爲斷絕著卽督飭帶兵文武實力按拏不准疏  
懈據琦善奏逆匪改易服色希圖他竄難保其不隨處溷迹尤應

實力防範以免墮賊奸計原片著鈔給閱看將此由六百里加緊諭令知之○諭據袁甲三奏皖省霍邱一帶土匪猖獗其地距潁州甚近郡城緊急之至請飭牛鑑進駐潁州以壯聲威等語牛鑑本在陳州前經諭令英桂督飭該員嚴防要隘見既潁郡喫緊若有疏虞則皖豫處處可通歸陳等處亦甚可慮著英桂卽飭牛鑑帶領兵勇剋日馳赴潁郡以資防剿袁甲三見赴臨淮庶彼此聲勢聯絡固皖省之藩籬卽以保豫疆之門戶桂良前奏有賊催後起由蘭儀續渡之說已諭該撫與王履謙長臻等嚴飭梭巡慎密防守見在賊陷臨清勢甚猖獗阜城餘匪亦未殲除若蘭儀河口再任賊匪續渡該撫自問當得何罪又據琦善探得賊匪有改換服色頂帶僞充官兵希圖竄擾鄰省等語著英桂嚴飭地方文武員弁分兵哨探認真查察不可墮其奸計至彰德衛輝等處近接

大名距臨清不遠亦當趕緊設防昨據邵燦奏彰德地方官民團練尙堪自衛其衛輝地面則團練寥寥殊不足恃著卽督飭該處文武嚴密防範並督率紳民實力團練毋稍疏懈英桂見時究竟曾否出省並歸德信陽兩路防堵情形作何布置著卽統籌全省大局隨時奏報斷不可株守省垣致滋貽誤琦善片並著鈔給閱看將此由六百里加緊諭令知之○諭昨經降旨諭令曾國藩迅由岳州統領舟師馳赴楚北爲肅清江漢之計原以該省軍情緊要不獨上游荆江一帶籌防至重而孝感等縣賊勢方張屯踞漢陽漢口逆眾仍復肆意游駛此股一日不除武昌一日不能解圍疊據青麐等奏報各情僅知專顧省城能否分兵渡江以剿爲防迄未籌計及此台湧帶兵督剿雲夢等處竄匪兵力甚屬單弱卽漢陽一帶尙未能力掃兇氛更難渡江援應武昌大江南北任賊

往來紛突非亟籌廓清江面何以爲擣穴揜渠之計著曾國藩迅  
卽遵照前旨剋日帥師東下迎賊所向併力殲除此時得力舟師  
專恃曾國藩水上一軍儻稍涉遲滯致令漢陽大股竄踞武昌則  
江路更形阻隔曾國藩惟當權衡緩急相機速辦朕既以勦賊重  
任付之曾國藩一切軍情不爲遙制應如何與台湧青麐等聯屬  
聲威互相援應並著隨時妥籌毋誤事機爲要將此由六百里加  
緊諭令知之○予湖北漢陽殉節知縣劉鴻庚祭葬世職○調福  
建廣東兵各二千名赴江南軍營勦賊○辛酉諭內閣嗣後冊封  
皇貴妃貴妃及妃應製金冊寶冊封嬪應製金冊均著改用銀質  
鍍金著爲令○諭軍機大臣等前有旨令舒倫保將防守潼關之  
兵移紮豫省黃河南岸以爲歸德等處援應茲據台湧奏德安雲  
夢相繼失守已催令舒倫保帶兵速赴武勝關與台湧合力攻勦

惟潼關一帶空虛必須重鎮方足以資防守本日已有旨令扎拉芬署理西安將軍著卽督兵駐紮潼關籌辦防堵其毗連湖北之商雒等處仍著與王慶雲隨時咨商辦理毋稍疏虞將此由六百里加緊諭令知之○諭前有旨令舒倫保帶兵馳赴黃河南岸擇要駐紮實力防剿本日據白湧奏賊匪竄撲德安雲夢等處相繼失守該督繞赴武勝關遏其竄路徐圖克復等語白湧所帶兵勇本係收集潰散之餘復經挫折更屬單弱武勝關爲楚豫交界要隘且由德安至信陽一帶徑路分歧必須扼要嚴守方能遏賊竄逸著舒倫保迅速督飭原帶官兵馳赴武勝關與白湧聯絡聲勢防剿兼施總以堵賊北竄爲要見在阜城未復臨清久陷萬不可再令逆匪續行闖入豫境致滋蔓延將此由六百里加緊諭令知之○諭白湧奏賊眾鈔撲郡縣相繼失守一摺覽奏曷勝憤懣該



督自上年十二月馳抵德安接辦防堵迄今數月之久自應先事豫籌妥爲布置前此克復黃陂正望其督兵進剿何以所帶兵勇遇賊卽潰以致德安雲夢孝感應山等處相繼失守據稱兵勇多係收集潰散之餘將士亦無固志何以不能多方激勵坐視潰敗僅欲以一死塞責於事何益逆匪竄入德安其勢甚張此時總以扼守要隘杜其北竄爲第一要著該督見駐武勝關該處與豫省毗連務卽督飭佈克慎帶兵實力堵禦勿令逆匪闌入河南境界該督統轄全省責無旁貸雖事處萬難仍當熟計兼籌以冀保全大局豈可專恃血氣再以鹵莽僨事此次潰散兵勇著查訊明確卽行正法以肅軍律德安等府縣文武下落並著查明具奏將此由六百里加緊諭令知之○諭據白河奏兵勇潰散郡縣相繼失守請飭豫省撥兵助剿並據英桂奏信陽一帶布置情形各一摺

湖北賊匪連陷雲夢德安等處勢甚猖獗台湧已督帶官兵繞至武勝關遏賊竄路該處爲由楚入豫扼要之區果得精兵鎮守逆匪自難竄越台湧自兵勇潰散之後所帶官兵爲數無多實屬難資堵剿著英桂速卽挑選精兵二千名派委得力員弁星夜馳往聽候台湧調遣總兵柏山已經英桂派赴武勝關著卽飛催前進不得稍有遲誤德安等處與豫省交界處所路徑紛歧仍著隨地嚴密防堵毋任賊匪繞越英桂見雖患病布置尙屬得宜一切防剿必須盡心籌畫以副委任林揚祖經該撫派令帶兵出省是否得力仍當隨時察看毋誤事機將此由六百里加緊諭令知之○台湧奏賊眾鈔撲德安郡縣失守得旨何至一無攔阻任賊長驅潰散情形殊出意外初十日德安失守十四日應山失守彼時何不趕緊馳奏直待至十七日始由六百里具奏又無加緊字樣豈

已昏憤糊塗耶想汝由德安敗走狼狽已極○山東巡撫崇恩奏  
臨清州文武各官殉難情形得旨該文武力保危城終遭慘禍汝  
身任封疆亦稍知愧憤否○以湖北德安雲夢應山被賊竄陷革  
湖廣總督台湧職仍畱任○以勦辦上海賊匪延玩摘江蘇巡撫  
許乃釗頂帶○予山東臨清殉節知州張積功副將慶德等祭葬  
世職建祠○壬戌諭軍機大臣等僧格林沁等奏連日進攻情形  
一摺逆匪竄踞阜城尙有萬餘分占關廂村莊四處我兵屢次誘  
敵仍不過小有斬獲總未能痛加勦洗該逆負隅抗拒又已月餘  
臨清逆匪近據勝保奏稱十七日進攻僅斃賊多名亦未能將賊  
壘卽時攻克且稱該逆仍分踞城外關廂恃爲犄角是該大臣等  
勦辦兩處賊匪均未能剋日奏功尤恐頓兵日久師老力疲致南  
北之賊聯爲一氣防剿更形棘手昨據台湧奏湖北逆賊連陷德

安雲夢應山等處該督繞赴武勝關已諭令舒倫保柏山等帶兵馳往堵剿該處與豫省毗連能否杜其北竄尙難豫必此時阜城之賊儻能及早克復或與勝保分路進攻或大軍合力併剿聲威旣壯自可漸就肅清若再事遷延致敗竄餘匪牽掣我軍北路全局尙可問耶前調大礮諒已運到著該大臣等督飭官兵迅速進攻不可畏難自阻賊眾旣願投出卽當設法解散以孤賊勢仍須嚴密防範不可大意致墮奸計並飭慶祺趕緊設法開挖地道以備轟擊前據琦善奏賊匪每假冒服色希圖溷迹等語著該大臣嚴飭各營實力稽查毋稍疏忽原片著鈔給閱看將此由六百里加緊諭知僧格林沁並諭西凌阿托明阿知之○諭惠慶奏廣西團練日壞請急籌挽救一摺逆匪自粵西竄出以後蹂躪數省近復逼近畿疆尙未撲滅前曾疊次諭令各省實行團練保衛地方

並諭勞崇光惠慶通籌全省大局親往督辦本年三月貴州學政黃統奏柳州慶遠百色等府廳盜賊肆行沿邊地方戒嚴復經諭令勞崇光與惠慶督飭文武趕緊剿除並勸諭團練以助兵力旋復據勞崇光奏剿辦各屬土匪情形並稱調兵措餉實已智盡能索一籌莫展該撫在粵有年於該省情形自應熟悉所有剿匪辦團各事宜何至毫無把握迄無一定章程如惠慶所奏省外團練多爲伏莽之藪兵至則爲團兵去則爲賊敗壞至於此極實堪痛恨近日各省情形皆由於官民各不相洽團練藉資紳士假令地方官妥爲勸諭委任得人自能著有成效若辦理四年之久地方賊黨愈多咎將誰諉著勞崇光惠慶酌量地方情形妥爲籌辦總期官民相安庶不至多生枝節並著揀派賢員隨地隨時督率公正紳耆會同妥辦儻令滋生事端該撫等自問當得何罪耶至所

稱龍啟瑞朱琦總辦團練何以不能認真經理所有獎勵紳士開單濫保並有擅作威福遇事把持等語著勞崇光惠慶秉公查察破除情面其有藉團練爲名假公濟私必當嚴行懲辦若紳耆中公正有爲者亦必當隨時激勵勿令解體該撫等務當統籌全局使官民上下同心協力以除奸宄而靖地方惠慶原摺著鈔給勞崇光閱看將此由六百里諭令知之○癸亥諭軍機大臣等雷以誠奏設法勸捐以助兵餉一摺據稱防守東路以來軍餉各項皆取給於裏下河十數州縣之捐輸上年秋冬及本年二月間曾疊次撥解琦善等營軍餉見擬將所募練勇酌量裁減卽以裁減餘項接濟琦善各營官兵之用仍極力勸捐專事籌餉等語所奏自係因時變通之法尙屬籌辦得宜著琦善卽飭雷以誠將裏下河一帶商民諄切曉諭實力勸捐俾該商民等咸知捐輸接濟兵精

卽所以保衛身家自能踊躍急公不至遷延觀望至仙女廟邵伯鎮等處各村集旣據雷以誠奏稱所築土圍礮樓砦堡一律完整並附近要隘所團各鄉勇亦頗有技藝著琦善仍飭令該革員認真查勘毋得始勤終怠所有捐輸團練事宜卽責成雷以誠悉心妥辦爲要該大臣務當督率水陸將弁迅將瓜州餘匪悉數埽除毋再遷延老師糜餉致干重罪將此由六百里諭令知之○諭雷以誠奏試行捐釐助餉業有成效請推廣照辦以裕軍儲並開列章程呈覽一摺粵逆竄擾以來需餉浩繁勢不能不借資民力歷經各路統兵大臣及各直省督撫奏請設局捐輸均已允行茲據雷以誠所奏捐釐章程係於勸諭捐輸之中設法變通以冀眾擎易舉據稱裏下河一帶辦有成效其餘各州縣情形想復不甚相遠著怡良許乃釗楊以增各就江南北地方情形妥速商酌若事

屬可行卽督飭所屬勸諭紳董籌辦其有應行變通之處亦須悉心斟酌總期於事有濟亦不致滋擾累方爲妥善雷以誠摺單均著鈔給閱看將此由六百里各諭令知之○諭和春福濟奏酌派已革總兵赴正陽關防剿等語該提督等圍攻廬州固不可緩而西路空虛必須得力大員帶兵扼要防剿以堵賊匪續行北竄見旣不能迅克廬州徒使大兵爲賊牽綴實屬昧於事機已於摺內嚴切批示矣郝光甲前在山西追賊遲延迨催赴直隸軍營又復觀望不前其居心巧滑殊不足恃霍邱土匪情形前此寄諭已經詳示正陽關爲賊匪自西竄北必經之路該提督等乃稱爲形勢稍緩派令不能得力之員前往防剿何不知緩急若此著和春福濟仍遵前旨卽將所派官兵交秦定三管帶剋日馳赴正陽關督同劉玉豹認真防剿其霍邱等處均責成秦定三嚴遏賊匪北竄



並相機進攻六安與和春等聲勢亦可聯絡郝光甲仍行撤回廬  
州軍營隨同打仗其應否仍用陝甘官兵之處亦著和春等妥速  
籌撥毋稍延誤見在賊匪雖據探稱盡返廬州其六安亦必有賊  
黨占踞且既由正陽關回竄安保其不去而復來設正陽關霍邱  
一帶防剿委任非人致令賊匪又復乘間北竄則東豫兩省處處  
喫重關繫大局甚爲緊要該提督等豈可一誤再誤耶將此由六  
百里加緊諭知和春福濟並諭秦定三知之○命順天府府尹楊  
需馳往河南協同巡撫英桂辦理防剿事宜○甲子諭內閣前因  
勝保奏參張亮基欺飾冒功等情當經降旨將張亮基革任發往  
軍臺效力贖罪嗣復據張亮基奏報本月初九十四等日勝仗均  
交勝保善祿崇恩秉公確查具奏茲據勝保等奏查明張亮基於  
初九十四日兩次進攻賊壘雖皆獲勝每次殺賊僅一二百人練

勇亦有傷亡該革員信任典史陳韜但憑其言入奏於打仗情形  
尙多不實見在張亮基染患目疾請給假醫治等語張亮基於軍  
務重情不知詳細考覈輒聽信委員誇張之詞率行入奏實屬罪  
有應得著仍遵前旨發往軍臺效力贖罪並著勝保等派員卽日  
押令起解不准藉病請假致任逗畱湖北棗陽縣典史陳韜雖臨  
陣尙知奮勇而性喜誇張語多不實且行文出示輒以監軍自稱  
謬妄已極著交部議處所有兩次接仗出力之勇目人等仍著勝  
保等查明具奏○諭勝保等奏進攻賊壘續獲勝仗一摺逆賊自  
竄陷臨清州城仍占踞城外關廂負隅抗拒勝保慮及該逆乘虛  
西竄與德勒克色楞密商設伏之法出其不意以期制勝卽抽撥  
黑龍江蒙古馬隊多名派委總管平海二等侍衛榮全協領巴依  
胡朗帶領前往西南一帶扼要潛伏夜間大股擁至意圖竄突我

兵遙聞聲息寂然不動俟其行近齊聲吶喊直前截殺槍箭並發該逆猝不及防無能抵禦旋卽亡命奔回賊隊大亂我兵奮勇追殺斃賊四五百人該逆黑夜之中彼此不能辨認自相踐踏擊殺及情急投河者不計其數其裹脅之眾經官兵解散並乘亂逃出者不下三四千人此次設伏邀截斬獲甚多勝保等務卽乘勝會合兜圍一面嚴扼紛竄一面迅籌攻剿收復城池盡殲逆黨毋任遷延貽誤致干重罪○諭軍機大臣等勝保奏連日焚燒浮橋並設伏誘賊疊獲勝仗各摺前降諭旨謂勝保倖賊南竄原因該大臣前奏於西北一路則稱以血戰當之於回竄東南西南則稱惟有跟蹤追剿是以責令就地芟除亦仍係該大臣前次自行具奏之語且所稱東昌豐工劉家口等應行布置之處無不一一指示並未嘗令該大臣抽撥進攻之兵分防南竄之路乃此次奏報轉

稱遏其北竄已覺大費躊躇直似北路尙無把握南竄更不待言  
顯係有心剖辯試思逆匪若竟由南竄紆折西向何處不可繞越  
北犯該大臣之意以爲沿途截殺較之頓兵相持易於得力此亦  
實在情形屢次奏報無不以此爲長策然自獨流賊竄之後一到  
阜城又復負嵎抗拒殲滅無期該大臣所自信者尙不能收效於  
前朕豈能不爲顧慮上次硃批所謂若又南竄更難收拾該大臣  
豈以爲無足重輕耶至牽涉前此諭令進駐德州之旨尤屬非是  
賊氛初入東境阜城距德州較近朕豈能料善祿張亮基之不能  
要擊致令逆匪折而西竄若使當時逆匪竟由大路北竄繞出臨  
清則德州正當其衝該大臣進兵清河又不轉在賊南乎况緩兵  
徐進之語豈亦諭旨中所有緩急機宜原在統兵大臣身在軍營  
者隨時斟酌朕亦未嘗因該大臣不駐德州責其違旨該大臣乃

以諭旨爲口實曉曉置辯於事何濟至所稱局外疑謗豈得盡無  
卽如張亮基密陳各片雖係一面之詞斷不能動朕之聽而所稱  
出隊時毫無知會撤隊時始派接應按之本日該大臣覆奏練勇  
接仗摺內各情節似亦不盡虛誣朕此時但以勦賊爲重該大臣  
果能力挫兇鋒迅殄妖氛卽有性情偏僻之處朕亦不遽加以譴  
責總在該大臣平心自問有則改之無則加勉自能間執護口若  
事事負氣不能深籌熟計致逆匪日久稽誅國法具在不待他人  
之參奏也桂明已抵館陶穆輅雙禧之兵據桂良奏報亦已到防  
卽著迅速督催併力進剿大名一帶復經桂良添派駐防正定之  
大同兵五百名前往協防著一併歸該大臣調遣至軍餉一節復  
據戶部奏請將山東漕項折價畱爲勝保軍需等語著諭知崇恩  
妥速籌辦此係京倉正款因軍餉緊要特照部議以濟急需該撫

仍當嚴飭藩司糧道按數改折以備支給儻出入之間不免折耗  
卽酌量將米石撥營備用覈實報銷仍著先將銀米數目分晰具  
奏並咨明戶部以憑查覈戶部片一件並張亮基片三件均著鈔  
給閱看將此由六百里加緊諭知勝保並諭德勒克色楞善祿崇  
恩知之○駱秉章奏湖北與湖南唇齒相依湖北之賊氛不息湖  
南接壤各府縣在在可危與其坐待賊來不若出境先剿與前禮  
部侍郎臣留國藩先後札飭胡林翼及副將塔齊布升任同知直  
隸州王鑫等督帶兵勇分道進剿崇通賊匪王鑫由蒲圻前進適  
蒲圻新到賊眾甚多勢將南犯遂擬就近迎剿初八日行抵羊樓  
司地方前營遇賊失利王鑫督中營繼至率勇奮擊斃賊百餘賊  
已敗退正造飯間忽賊匪遙擁而前分路鈔襲王鑫率湘勇分投  
抵拒鏖戰數時勢漸不支紛紛潰退折回岳州賊眾躡蹤緊追初

十日全股直撲岳州曾國藩卽飭知州朱孫詒等率南勇六百先  
出迎敵頗有斬獲湘勇繼進互有殺傷賊眾更番抗拒湘勇疲乏  
收隊暫入岳城賊分三面急攻曾國藩調水勇礮船駛赴岳陽樓  
下開礮轟擊斃賊百餘賊勢稍卻各勇始得縋城而出此初十日  
接仗失利之實在情形也曾國藩以陸勇失利水勇難期復振探  
聞賊匪水陸並進省城防兵無多情形喫重遂率水勇礮船乘風  
暫回長沙其圖守禦已於十四日抵省頃探賊舟前隊百餘號乘  
風上駛已至白魚磯距省城僅百五十里順風一日可到而竄岳  
賊匪有卽日分道竄撲省城之信臣見會同曾國藩飽起豹熟籌  
防勦機宜存城官兵實止三千有餘僅敷守垛之用前調新甯在  
籍知府江忠濟選募楚勇一千二百名甫於十二日抵省見紮營  
北城外江忠濟臥病在家臣復飛札敦促再募楚勇一千力疾督

帶來省聽調並飛調辰州各營兵一千名令都司景福等分帶前來曾國藩見統帶水勇戰船分布省河扼賊上竄其未及到岳之湘勇各營及招集新潰之勇擬卽紮營南城天心閣外期於內外聯絡水陸交防至前委胡林翼塔齊布等進剿湖北崇通賊匪此時賊匪復竄岳州該員等懸軍深入餉道堪虞臣已密札飭其酌度機宜全師出險升用同知直隸州王鑫平素剿匪尙屬得力此次恃勇輕進以致失利咎實難辭應請旨革職畱營帶勇效力贖罪以示懲儆上諭駱秉章奏前因湖南剿辦由陸路南犯賊匪獲勝疊經前令曾國藩統領舟師出境掃除江面賊踪乃因蒲圻新到賊眾甚多升用同知直隸州王鑫迎剿於羊樓司地方拒戰失利折回岳州該匪全股直撲郡城曾國藩督率各員帶勇轟擊城內各勇乘賊勢稍卻縋城而出曾國藩遽率水勇礮船回省守



禦致賊舟前隊已至距省百五十里之白魚磯覽奏曷勝焦灼見  
在長沙省城防守自關緊要該撫已飛調江忠濟募勇力疾赴援  
復添調辰州官兵來省並與曾國藩布置內外水陸各地方文武  
紳勇聯絡聲勢當可力保省垣惟岳州爲南北要隘上則屏蔽長  
沙下則援應武昌咽喉重地豈可置之不顧仍著曾國藩酌撥船  
礮設計迎截並著飛咨胡林翼塔齊布斷賊後路一面分撥兵勇  
於平江益陽兩路進攻岳州使該匪腹背受敵則省城之勢不至  
危急而胡林翼等一軍亦較有接應且可相機水陸兩路援應武  
昌曾國藩所統礮船勇多餉足原爲肅清江面今旣未能迅速下  
駛亦豈可株守長沙坐俟逆賊之至而不爲南北兩省通籌大局  
耶鮑起豹提督全省軍務何以未嘗出省勦辦賊匪著與駱秉章  
等熟籌防剿一面保護省城一面相機進攻曾國藩仍應統帶舟

師下駛或分撥船勇派委得力將弁併力攻擊俾湖南境內賊氛

掃蕩庶可爲援應湖北之計見在黃州上竄之賊已疊陷孝感雲

夢德安應山北路情形萬分喫緊非有大隊水軍駛至漢陽江面

無以牽綴該逆之後別無釜底抽薪良策駱秉章曾國藩當如何

急籌奏功爲兩湖全局計也王鑫輕進失利著卽革職該員平素

勦匪尙屬奮勉著准其畱營帶勇效力贖罪將此由六百里加緊

各諭令知之○文瑞以病免以基溥爲刑部右侍郎

由正白旗滿洲副都統遷

○英桂因病賞假以鄭敦謹暫署河南巡撫

由布政使署

○乙丑閩浙

總督王懿德奏報到任日期並請覲得旨著不必前來俟今歲冬

間或明年秋間酌量地方情形再行奏請卿之心地才幹朕深知

之必能勝任尤應時加振作綏綏必有起色閩省文武積習斷非

一朝所能挽回也○丙寅僧格林沁奏逆匪前受懲創堅匿不出

二十二日斗起大風該逆乘風由塔兒頭村擁出二三百名撲向西南營壘馬步官兵齊進擊斃賊五六十名該逆敗退二十三日豫派侍衛達崇阿帶領馬隊官兵二百名伏於前次燒毀賊巢其餘馬隊官兵在濠邊屯紮以備接應臣帶領小隊官兵數十名在縣城紅葉屯適中之樹林內暗伏卽飭馬步各隊官兵往誘該逆並不出巢當將官兵撤回臣仍伏林內該逆在城上及樓房瞭望見我兵人數無多大隊全行撤回隨由紅葉屯撲出賊匪二百餘名達崇阿帶兵出村從中截擊斃賊數十名忽南關東南關紅葉屯塔兒頭村撲出賊匪四五千名遙擁而至直撲南面當將達崇阿撤回同小隊官兵一字排列該逆三面直撲見我兵屹立不動不敢前進復飭達崇阿帶兵壓下斃賊五六十名復將達崇阿撤回仍前排列該逆數千之眾見我兵二百餘名從容不迫隊伍整

齊正在懷疑間將軍瑞昌等帶領盛京步隊官兵侍郎培成等帶領察哈爾馬隊官兵副都統那敷德帶領昭烏達密雲官兵從東南正南西南壓下副都統烏凌阿等帶領官兵從東北正東壓下副都統達洪阿帶領官兵撲近賊隊奮勇直前斃賊不計其數該逆見官兵驍勇欲奪路逃回我兵四面兜擊該逆潰逃無路拌死抗拒我兵奮力攻擊復又斃賊多名鏖戰三時之久時已昏黑徐徐撤隊該逆等此大創勢必死守不出惟有再爲設法極力進攻以期迅速蕆事 上諭軍機大臣等僧格林沁奏連日誘賊出巢官兵屢獲勝仗一摺逆匪竄踞阜城堅匿不出總未大受懲創二十三日該逆突出直撲南面顯係奪路奔逃欲與臨清之賊互相勾結見在大礮業已到營著該大臣卽督飭員弁趕緊進攻以期迅速蕆事本日據勝保等奏乘夜進攻焚燒賊巢三處惟城外

賊巢尚有十餘處城內賊匪亦復不少軍營馬隊無多不敷遏截  
追剿請將穆輅所帶之兵一千名撥赴阜城於僧格林沁軍營內  
明慶烏凌額所帶馬隊官兵酌撥一千名或八百名速赴臨清聽  
候調遣各等語著僧格林沁卽於明慶等所統馬隊官兵內酌量  
調撥穆輅所帶之兵雖未經戰陣惟均係火器營勁旅該大臣素  
所深悉驅策必能得力總期統籌全局毋誤事機該大臣勦辦阜  
城賊匪責無旁貸固不可令與臨清逆賊聯爲一氣若令突圍而  
出再致滋擾他處朕惟該大臣是問將此由六百里加緊諭知僧  
格林沁並諭西凌阿托明阿知之○諭勝保等奏乘夜進攻焚燬  
東關外賊巢三處斃賊多名一摺逆匪竄臨清經勝保等督兵  
攻剿屢獲勝仗勦辦尙屬得手惟賊巢尚有十餘處城內之賊亦  
復不少必當乘此聲威迅圖殄滅固不可任其奔突致與阜城之

賊句結亦不可令其負隅死守率掣我師本日據僧格林沁奏稱連日誘賊出巢屢獲勝仗而阜城尙未克復此時該大臣自應先卽所帶官兵妥爲籌辦毋誤事機至穆輅雙禧所帶之兵何以日久尙未到營著勝保查明如有意延宕不遵調遣卽行嚴參逆匪疊受懲創其勢已挫我兵於西北一路必能力遏賊衝其東南正南僅抽撥馬隊三百名渡河分紮尙恐不敷堵剿該大臣務卽統籌全局激勵弁兵迅將此股逆匪就地剿除勿令蔓延將此由六百里加緊諭知勝保並諭德勒克色楞善祿知之○調吉林黑龍江兵各一千名赴山東軍營剿賊○調甯夏兵五百名赴河南軍營剿賊○丁卯諭內閣勝保等奏乘夜焚燬賊壘殺賊無數克復臨清州城一摺逆賊攻陷臨清後節經官兵截殺堅壁不出復經勝保用大礮晝夜向賊營轟擊二十五日勝保派令桂明桂齡孔

廣順等帶兵由西北進攻善祿雙禧帶兵由東南進攻已革藩司張集馨帶練勇與侍衛蒸鉦等由西面攻擊三面同時並進勝保親督馬步官兵在城北列陣以待時西北風微作我軍銜枚疾走至二十六日丑刻西面練勇潛行過河向賊巢拋擲火彈齊聲吶喊賊眾驚亂急開槍礮抵禦我兵奮力撲入大隊一擁而進燒斃槍斃賊匪枕藉於地約計三千餘名我軍追殺直抵南面賊巢賊隨拒隨逃向南竄散城內之賊不敢竄出猶於城上開放大礮經崇恩帶領協領久祿等合力進攻我兵踊躍先登立斃城上賊匪多名臨清州城登時克復兵勇分股搜殺復斃賊三百餘名裹脅之眾逃散者不下數千名奪獲羸馬火藥槍礮刀矛旗幟無算德勒克色楞善祿克興阿魁福綿洵等當卽督兵追剿勝保亦卽督帶馬隊繼進逆賊由皖豫竄擾東境勢甚猖獗此次殺斃及擊散

之賊不下萬人勦辦尙爲得手勝保善祿崇恩前次摘去頂帶革職處分均著加恩開復德勒克色楞著賞還花翎並開復降留處分所有在事出力員弁兵勇等著勝保酌量保奏候朕施恩見在賊匪南竄必須盡力追勦悉數殄滅著勝保等督率各路官兵趁此聲威一鼓殲除毋令餘匪紛竄○曾國藩奏下於三月初五日在岳州舟次札飭貴東道胡林翼前平江縣知縣林源恩前往平江防勦崇通賊匪隨又派副將塔齊布守備周鳳山帶勇直搗通城旋據林源恩會同署平江縣知縣汪敦灝暨胡林翼等先後稟報初二初六兩日與賊接戰屢獲勝仗前後共計殺斃賊匪千餘賊匪連夜狂奔由通城竄回崇陽又據塔齊布稟稱初五日自岳啟程聞白港地方有賊匪沿村擄掠初七日督勇至石南橋進勦斃賊四十餘人生擒二十二名初八日馳赴通城收復縣城此勦



辦平通股匪疊獲勝仗之實在情形也至岳州一城前經撫臣札飭朱孫詒帶勇六百人追剿又札王鑫帶勇二千餘人扼防臣隨身又帶有陸勇一千六百人兵力本不爲單因崇通股匪過多王鑫於初六日自岳啟程取道蒲圻前進初七日至羊樓司適與賊遇前鋒少挫王鑫率勇踵至殺賊百餘大股賊匪分四面鈔出眾勇勢難抵禦紛紛潰散初八日仍回岳城初十日早賊大隊卽來犯岳官軍眾寡不敵勢難抵禦各營以次奔潰惟監生郝壽璋一營五百人毫無驚怖被賊數千圍住各勇併力苦戰卒得衝圍而出殺賊極多各勇有退回城內者賊卽乘勢圍城三面皆係賊隊惟西面濱湖一門無賊臣當遣大小戰艦駛赴西門開礮環擊其斃賊百數十人賊勢稍卻各勇卽乘隙縋城而出此岳城陸路戰敗水軍小勝之實在情形也臣奉命赴下游會剿舟次岳州原飭

水陸各勇俱於岳州會齊俟各勇畢集誓師東下爲肅清江面之計不料後幫陸勇二千水師二千皆以阻風洞庭不克依限抵岳而前幫陸勇又先遣千八百人至平通臣隨身止有陸勇千六百人卒遇金口大股賊匪數萬來犯遂至潰敗陸路旣已失利水軍亦無固志初七大風以後各船損壞力難應敵適因賊水陸大隊全數南竄湘省臣遂乘風上駛退保省城但冀保此船礮畱爲將來殄寇之資則臣雖蒙恥獲罪亦不敢惜至臣奉命會剿尙未出境卽有此挫皆由臣調度乖方所致請旨將臣交部治罪上諭曾國藩奏岳州水路各軍接仗情形並自請治罪一摺此次岳州水軍雖獲小勝惟因陸路失利以致賊匪復行上竄曾國藩統領水陸諸軍調度無方實難辭咎著交部嚴加議處仍著督帶師船迅速進剿克復岳城卽行赴援武昌毋得再有延誤○諭軍機大

臣等前據駱秉章奏賊匪復由岳州上竄曾國藩退保省城並塔  
齊布一軍懸駐崇陽通城一帶聲勢隔絕已諭令駱秉章力保省  
垣曾國藩仍分兵進剿並飭鮑起豹不得安坐省城致成株守本  
日據曾國藩奏岳州陸軍敗潰水路小勝並船隻遇風沈損各情  
形已將曾國藩交部嚴議矣曾國藩所統各勇爲數過多既須剿  
辦粵逆又須搜捕土匪卽如所奏有撥赴平江通城者有撥赴臨  
湘蒲圻者又有不能依限前進者散布各處照料旣不能周勦辦  
自難得力一有敗衄人無固志似此何能力圖進取此時肅清江  
而專恃此軍曾國藩一人誠恐不能照顧著卽與駱秉章妥爲商  
榷不論文武大員在籍紳士有可協同帶勇之人卽著一面具奏  
一面飭令來營管帶以資攻剿四川鹽茶道夏廷樾見已畱於湖  
南勸諭捐輸著卽幫同帶勇進剿曾國藩初次接仗卽有挫失且

戰船被風沈損多隻何事機不順若是究竟所損各船有無器械  
餉需爲賊所得著卽查明據實覆奏駱秉章所調兵勇諒已陸續  
到省曾國藩師船總以進復岳州兼籌東路爲要見在湖北待援  
孔急若逆匪久踞岳州分屯益陽我軍阻隔省河日久相持下游  
愈形喫緊曾國藩以在籍紳士若止知專顧湖南不爲通籌之全  
計平日所自許者安在鮑起豹本係水師大員何以不令督帶舟  
師剿辦賊匪是否不能得力且該提督何以陸路亦未帶兵前進  
著駱秉章等查明具奏將此由六百里加緊諭令知之○諭本日  
據勝保奏克復臨清督兵追剿一摺據稱賊已南竄更慮其詭詐  
百出從旁繞越北犯著僧格林沁迅卽確探消息嚴密防範前諭  
該大臣將明慶烏凌額所統馬隊調赴勝保軍營此時是否啟程  
如賊果南竄離阜城較遠卽著此項馬隊趕緊馳赴臨清協同追

勦儻賊有北犯之意無論大名及山東東昌德州一帶均著該大臣迅派馬隊迎頭截擊萬不可稍事耽延仍著嚴飭軍營將弁一律嚴防並與勝保桂良載齡等隨時知照毋稍疏虞將此由六百里加緊諭令知之○諭勝保奏攻克臨清州城餘匪南竄一摺所稱賊匪乘隙出街向南紛竄並無確實去向難保該逆不繞越他竄此時逆匪大股北來其意圖北犯之勢甚決斷不肯因連次敗挫卽折回故道臨清西南緊接大名廣平由東南而北直抵德州距阜城之賊甚近本日已諭僧格林沁確探賊蹤儻逆賊果向南奔卽將明慶等所帶馬隊迅速調往隨同追勦儻有旁竄北路之信卽飭此項馬隊隨處迎勦勝保亦可前後夾擊該逆詭譎百出或精銳早已潛竄而畱孱弱裹脅之眾以當我兵威則雖克復州城仍非了局該大臣等務當乘勝窮追使該逆不得喘息自不至

再有蔓延勝保屢以追賊獲勝此正可以得手之時若能迅殄逆氛立清畿輔不特前次處分可一併開復尙當榮膺懋賞也崇恩著卽畱於臨清督辦善後事宜東昌一帶頗形空虛卽賊蹤未曾擾及亦不可稍疏防堵勝保隨營軍餉卽著崇恩飛速運解毋稍落後將此由六百里加緊諭知勝保並諭德勒克色楞善祿崇恩知之○諭本日勝保奏臨清州城已於二十六日克復殲斃賊匪不下萬餘該逆向南奔竄見在德勒克色楞等已督帶馬隊官兵跟蹤追剿勝保隨後督兵繼進惟賊匪旣拌死北犯必不肯甘心南竄已諭知僧格林沁加意嚴防著載齡嚴飭各路帶兵大員愼密防守勤加偵探與僧格林沁勝保桂良隨時知照嚴拏奸細毋稍疏虞將此由六百里加緊諭令知之